

清容居士集

冊二



清容居士集卷第一

元 袁 桷 譔

賦

導游賦

陳郡袁桷家于甬之隅足不踰闕而四方交游往復之義亦能舉其概聞吳興子昂趙子清名雅言爲作導游賦道予所蘊亦以見夫思其人而不可見之意

詞曰

嘗悲乎好游之士閱終歲而莫聞非秉志而媚私亦飾行以矯羣方其命車於王良假驂於造父過屠繒之沛弔弦歌之魯許身結志慷慨偃僕抗銅盤以矢辭握幽蘭而結賦炫華堂之冰雪眇修途之霜露蓋將修斷金之利雖闚牆而莫我敢侮息肩于門晞髮于廬不一歲月迨見夫蠅聲而歌倚楹而吁雖千里之異殊何老壯之卒逾也世有索居肥遯擊門塞竇尊委俚之聞友汗青之朽是猶談智於尺寸測日於戶牖猛虎嚙齧幽猱悲啾獨行無儔謹操其輶粲彼

一士與時偕藏具大塊之清淑服忠厚以自昌余將往而未得倚吳山以相望
振衣中庭萬籟寂玄頤形廣顙眴兮翩翩墜余以言曰懷辛之椒人或議其妖
充梁之木人或惡其獨夫既自以爲直而亦豈不以爲曲阮生自持幾於目語
削木已漫假手于祖匪達人之曠羈終察察乎廉隅余驟然而笑喟然而思拂
龜以占莫測其疑抑搔首而歛歔故髣髴以致期遂伸之以辭回城之璧佩以
容兮環龍之劍喜其鋒兮伊若人兮物不可同兮我欲從兮樂有終兮江山兮
復長方舟兮可航辭未竟童子擁篲而前曰豈所謂千載之人耶吾當從子而
西矣

雲林賦

若知雲乎昭昭然服光以廣微隆然廓然又似夫五色萬物而沈幾來弗以趾
去弗以馳其始也盤辟夾輔輪輪困困孰合其處所其終也寸芒以興導轟轟
啓鈴鈴汨沮洳襄丘陵若慕而佇若泣而赴愀兮哀不知所訴蜿蟬眇綿含英
吐鮮道傾蓋而忘返粲接席以爭先誠果樂乎莫與之宣形成乎無形名生於

有名囿于家林允爲儀刑奉著占之曰居高而卑佩矩帶規升于木無往不復
不泄不辱言歸其谷伊南維湖將以爲居齊三日祝而泣諸蒼兮中峯式瞻其
端爲章爲祥爲輪爲冠風以潤之雨以需之挾陰而嘘乘陽而舒朝飛夕躋莫
窮其栖有翼者鵠遵于其涯曰將有行自東徂西綏而迎之維墉之崇施而流
之維泉之通以沐以容是謂雲林之宮

玄雲石賦

泗流迴淵禹朝步兮秉陰發奇靈鼈負兮玉質墨章浮帝都兮廉辨以清協磬
瀟兮堅剛洞虛積元感兮磅礴太素屹空嵌兮靜居泊如日儀以湛兮虛一闡
圖握九攢兮八方宣明二儀竅兮抱形介貞合窈眇兮緜緜緜道之奧兮肇
稱玄雲吾將以觀衆妙兮

淳賦

粵若邃古仁風熙熙擊壤灌陰以佚以嬉巷無天瘡物無癘疵祥麟應囿靈龜
負池樂以導和禮以黜衰齋齋其春渾渾其天守冲若虛不夸不鐫佩矩帶規

養於深淵擬諸樸兮文理具宣擬諸象兮充然混完見不以迹視不以形斟酌
大和胚胎粹精居之莫疑神維壹清若有若亡訖莫可名二儀緼緼肇分化醇
人行乎中孰全其真注茲玄酒淡兮在尊御史氏尹敏學潛珍服習典謨葆厥
靈根齋居靜儀人莫可聞攷諸庖犧其名曰淳

玉龜杖賦

有璞於此純淪氤氳瑤光之精爲靈爲文謹櫝以藏不泄孔温穹隆中乾夷靜
合坤淵淵其容深深其神爰有善木含章揚芬飾端以儀往來無垠鬱峨壽宮
有粲者雲維季翼翼聿懷彼濱跪而祝諸以奉番君曰履道坦而元吉者歟任
重而不希其力者歟視下而無危嬉戲如兒審時而行得良以防抑心自強底
夫康莊其形不孤其智若圓化而神之曷知其遷以相以持是謂期頤

桐柏觀賦

孫興公天台賦運意高簡忘象以求斯得之凝和盧君居是山以桐柏觀圖授
余曰子爲我續繹其景不揆瓦石援筆爲之賦曰

厚坤載德台山效靈蜿蜒扶輿天孫之精仙書易之以桐柏敞神界爲金庭轆
轤三光磅礴太空睇暘谷之倒景卒莫能擬諸形容也睽彼華頂羣山啓蹤倡
九牧以執玉巍冠仰其容容香林玉霄夾驂以從華林不彫臥龍褰龍玉泉御
右法蓮殿戎東峙翠微西蹲紫霄巧面勢以規輔玄扃沈沈乎沈寥維妙有之
珍館匪攀援之可求除三彭之內蕩守中戒以默修影息於鄧林機忘於海鷗
上池飲之以洞視金膏服之而冥搜不然者良不能以久留也粵昔子晉韜精
帝京弄參差於緱山搏扶搖以遐臨瓊臺儼其龜負雙闕屹乎龍蹲正右弼以
贊化千齡髣乎氤氲故茲山也四面削成中心知掌真風合於冥廓梵炁通乎
肸鬻三井之泉千尺之潭皋羽警其濃露髯羊匿於陰嵐飛梁凝冰側足涉蹇
翠藤流霜觸纓捫緣梭溪交流以織文忽蟠螭之鉤連望飛瀑之懸絕日五色
而成妍夫樂與餌過客所止夸誕逐魂踐形者恥長生之藥眇蒞於神山執期
之候談譎於五利卻衰疏頑簡易理得其亦有所益乎菌蠹春秀簣簣冬萌五
葉之松三脊之香丹光騰於金鼎冰泉徹於銅罍服食之而不墜身輕忽焉以

復丁企列仙之遺蹤葛翁策名於太極斗晶熒於樞紐金光雜流於瑤席納雷
 谷之砰磕窮幽淵之罔象丹鳳昔焉以來儀凡羽厥今以避讓諒守貞以制氣
 匪狡獪以增誑法不孤立道不虛行繼之者白雲先生受素書於軒轅襲帝胃
 於典午愴寡言而無營思坐忘以遐舉承唐皇之明問敷清淨之舊章署漆書
 于寶幢迎黃雲於玉堂厥後憲章希夷範圍靈寶誦藥珠之玄文過期頤以終
 考若是者誠何異於蓬島或有言曰樓臺榮觀方士侈崇夷考是山不綺而豐
 不幽而通廓兮其有容闕兮其訖逢味與公之抉奇訊擇木之寫真若增其欵
 蓋盡其竊深身不羽而凌逝俄曾城以瑤林乃若丹霞伏光鐵柯舒英集衆妙
 以凝睇髣三真之傳經擬金剛於鐵磨警黑業於鴻鐘何錢李之二王莫能悟
 其祿終猿抱子以望月虎伏威而調風靈漱清以集鸞哀弦急而驚鴻爰自有
 而卽無眇壹氣之鴻濛悼南國之蒸歎髣天都之肅冽彼夏蟲與火鼠徒自煎
 以內熱申之以辭曰

帝子下兮雲中質通明兮粹冲覽炎洲兮垢紛節容與兮茲峯蓬瀛杳兮無極

浪滔天兮不可以履境荒滅兮妄益曰此留兮吾將以內息神爲尻兮氣爲輿
朝紫霞兮暮清都黜視聽兮道靡渝歷千劫兮復故初雲凝素兮中壇鈴流露
今日噉三災屏兮嘉祉繁語夫世人兮歸休乎靜觀

椿堂賦

爲宜春彭有
年道士作

昔嘗疑夫漆園之叟學幻而逃虛詢蟲魚之疏考風土之書莫之敢圖余游上
京有容北窮夫金山西歷夫賀蘭南踰雕題東超三韓驟然而言芒芒禹跡子
所履者誠然乎冬裘夏葛寒暑之運環也今也日臨中街霜飛冰霾霧集於踵
貂挾於懷戴斗接浙承露凝楛子安視而靡猜駭聞忽見知奚窮乎齊諧吾先
枚夫九州者而言之屢熟之稻南州是專十丈之蓮華峯所傳栝化石以錫貢
樟生庭而爲州梅梁分以鎮妖祥牂肇乎維舟杞犬吠而質變蘧人形以劑投
華平維常瑞於皇圖萸茱屈軼盛於堯世木沈產子以成國樹古眩精而爲魅
松分秦王之封柏擅蜀相之祠若是則復何疑焉在昔大帝窮源崑崙見北溟
之鵬視之若雪卽之如雲得其遺羽丈尋不能以論是齊物者非寓言也耶維

老彭之遺裔握六氣以自馴肇茲齋居其名爲椿二儀網緼周流無垠則以自儀道合至淳吸兮若韞旋兮若輪肅兮似秋熙兮如春行乎六合而不躓則所謂八千者吾猶以爲歲年之稊米也客揖而去遂爲之賦

仁壽堂賦

合江老人杜 年八十有二其鄉人尊之以仁壽因名其堂子輝卿今爲蜀省掾來京師求賦賦曰

合江老人生於三卯歲之中秀眉疎明鯨背隱隆家事勅斷遺聞春容口欲宣而彌哽情屢發而莫逢會稽生揖而進曰生居東南襲輕飮甘耳不屬於鉦鼓目不接於戈鋌合江之事相傳於游談願削牘書槩俾鴻筆以有參老人改容正襟往似可尋夢若初覺病猶在身方其誓師斗城滅親割情盟重於白馬命輕於浮塵黃風颺沙千戍屏營擁若波湧排若算經危堞墮而礮激闔戟護而矢承臂者瞽者各有攸職熏室旁穴且不遑夕壞館門毀螿石樹列對峙填負旁隄卓飛泉於雲根起清流之千尺目不能承睫氣不得納息黑祲障空燐煙

蔽江橫厲排蕩扶擊春撞擬效順思投降提獎之主怒莫敢當忽風斂而川止
活噉喙於鼎湯噫嘻吁此其瑣譎者耳華陽之往躡肇於文翁悉於太沖纖侈
日滋由是鑠景福盪醇風鬼嘯高居神泣巨峯棧閣如砥萬騎突馳火連摩圍
氛翳峨眉築京觀以專戮甚稟街之陳尸順舟而下者十不得一緣澗歷塹視
京垓之豪釐崎嶇古渝前彭後余保衣冠之弱緒猶興文以舒徐逮夫六合會
同彈丸震驚發渙號以凜雪緝政俗以治平則夫兩州之土民無遺鏃之害歌
帝德以底寧會稽生仰而愀俯而笑在易之象復存於碩果物極者斯通感過
者斯禍維今老人熙熙其天休休其心事至不伎智藏惟深式是表儀化而悖
淫國有毫叟鄉有善人仁壽錫名爰則其淳感古樂今茲其爲擊壤之堯民

樂水圖賦

東坡先生脫遠游之履衣紫絲之衣與黃冠師跪坐息機臨清泠之淵憩巨樾
之陰意消言忘其得在心飛泉琮琤寒源杳深悲塵寰之隘險抱奇璞而莫陳
將以善夫濟世之極樂至理以自新維茲水之無倪非智者莫能以鑒彼河伯

之好夸終望洋而浩歎翳西海之沈羽竟其說以怪誕小大不同其病則通駭於所聞者忽所見誠哀乎舉世之盲聾余嘗披神禹之地圖考先生之轍迹而誦之方其發軔于瞿塘千里一瀉鑿燕安之醜媒悟孤孽之非禍雖盛氣之飄忽已足窮物理之化迨其中年倦趨分符東上慨河流之奔駛城不沒者三板先生胼胝以先激而返之有以遏其性之狂悍伊文登之貝宮空百幻以自獻實精誠之冥通異燃犀之獲譴至於羣妖肆憎百懾相乘先生怡然而行試正命於巨浸儼安流之無驚耿耿明夜乘桴南歸海若息波馮夷效奇混六鑿於一噫信天地之无私匪深於水者其能若斯耶玩王孫之游藝弄五采於素絲聽之而無聲卽之而若遺若然者欲以求先生之所樂無異畫餅之充飢

餘閑齋賦

曷不觀夫農父之治田春耕夏耘晝作夜緝望歲常有思憫苗若不及候其陰晴謹其涼熱食不滿嗛目不承睫穡事告成以祀以享入此室處曰余將有養休其四肢里閭熙熙甕牖迎陽茲其爲一歲之隙得以自怡者與古之志士範

圍天地之初冥搜密籌心如淵珠據會以集要積神以合虛冬爐夏葛謝而弗
居逮其蓄極以通若燭計龜卜物莫能沮燕居申申欲不踰矩倚門而歌聲裂
金石恢乎其有容順化而有得蓋其勤者若此則其終也乃以豫佚惟昔賢之
肥遯屹乎其頽波青林扶疎擢茲瓊柯味道以觀澹乎不頗閱世推移飲茲無
何養其粹精不激不阿有客仰止撫其嘉名以處以息慨然而言曰悲濁垢之
駢臻御吾輪兮焉窮愍逐日以道死異惜陰之度功厥今金馬公車履舄接踵
承色以求爲疲爲冗退食以休濯其靈根藏真養恬疏清滌祿庸式庸似著于
門顏維四民之有制實士農之居先惰于初者躓于後弊于智者懼于艱歸休
乎君援琴而歌曰羣動兮夜息貿貿兮吾徒曷猖恣不能以自適書兮在度聲
兮在席復吾初兮以無忒

息齋賦

慨太素之日凋服仁義者亦幾乎外馳百幻眩晃衆愛糾縻側身於積薪之上
試命於累卵之危髮盡化而齒將終竟不得要領以自持端木之智工於言結

駟之德色索其中誠餒然也史遷之足老於行悲憤之書不能以全其生也東門之悔華亭之悲是猶碎轂而大輻掘泉而止渴何其遲也古之至人止於其所不止休於其所不休兢兢惕惕不得而名之強名曰息夫息形者神清息事者愚絕息心者心愈馳息名者名愈徹莊周之息影爲荒唐陶潛之息交爲慨慷是皆未得其當若然者其必有自息之方夫知古而不知今謂之陸沈世故之岐多人事之機深生乎下都令又安能超舉以絕塵維李侯之靜好藹鄒魯之淳風不求異乎人默息以底于鴻濛振纓而趨簿領如焚上下雜糅否臧混淪一息而求之何異解牛之芒刃眇目於毫分也退居申申圖書領賓不喜不愠寂然含珍吾有以知其息之外陳者矣夫天地之理動靜濟焉偏一而用則爲五行之沴人身之氣如車軸窒而不流則爲疾癘爲末廢若侯者其何以爲息之體而余以爲外陳者豈侯之意歟他年成功而歸啼髮於彭咸洗耳於箕頽味乾健之旨以極君子之理吾不知侯之所謂息者其信然耶其寓言耶

凝雲石賦

爲張希孟作

文登之宮積濤成雪天風蕩摩海氣幻滅嶽峯蜿蜒堅若金鐵大者成巒小者成穴蜂房羣綴蟻曲百結爰有張子扶奇發珍藉以文錦炷以古熏陋博山之侈靡髣爐峯之氤氳湛然塵消號爲凝雲有客哆而笑曰南山朝躋奮搏無垠太素爲母五嶽爲賓合虛成形積潤以神今子友一拳於几席雲何自而凝哉張子倚梧而言曰窘尋丈者不能以喻大語荒忽者適足以資怪人惟至靈品物是賴明而通之呼吸萬籟決爲奔騰興爲靈霸其來無趾其去莫閱唯古至人韞玉以匱藏明于幽養神于獨內澄外觀嗒若槁木靜以自儀無喪無辱念此石友其德不瀆燕居相忘庸以熏沐則夫所謂凝雲者不待於外而自足也客喜而悟遂爲之賦

紅梅賦

闕闕羽仙朝歸絳都冰渟雪峙湛焉澄居候寒圭之微影察衆芳之榮枯草藏萋而永闕木脫葉以無徒彼陰陽之眇密曷能返乎玄虛於是天迴景溫機扶候促吉雲豐融美虹纒屬睠炎洲之嘉植渙乎其忍此垢觸也儼蕊珠之揚靈

貯初服於太素沐九芒之粹精蟠翠氣以內護潁容耿以自持兮抱冲密而莫
吐衣赤霜之羽袍曳文錦之靈佩棄明月之寒璫綴飛瓊以爲琲匪徇色以自
誇表昭質之莫昧凜世全之如焚絕微愠以卻背惟深根固蒂之不可恃兮將
求化以養晦繫煒煜之滑稽懼夫惡朱者之見毀鵠日浴以覈離鶴舞丹而希
壽念形色之莫踐徒變幻以眩售萬籟凝寂穆然長思絢此的爍申之以辭辭
曰貌充心明道之腴兮葆光采貞慎德樞兮渥丹自持惟受初兮不爍不騰莫
可渝兮時至神完吾其敷兮吾其敷兮物莫與俱焉

九華臺賦

混元之峯鬱爲仙閣霏青駭紅嶽崑相扶下垂清溪百流是趨昔有羽士恍兮
承跼縞衣玄裳其化莫追爰有堯年之叟植杖戒鉏顧瞻童土式崇墳壚黜幽
導奇以雍以除層臺演觀積成爲郭拾級以升家林滿圖乃擢孤芳絜泉廣疏
錫名九華葆茲清腴有客蒞止披情徐吁曰登高能賦大夫之職也爲我賦諸
客曰噉噉廩秋天風奏竽哀鴻赴空寒蟬抱梧脫者如掃縮者如枯落妍斂英

還形太虛存莫可禦去莫可居相彼九華孰爲有渝含章金衡承元坤輿弗媚
弗私苦心秉愉迴黃抱素包寒紛敷飛霜溢露言沾其濡獨立養完孰云彼汗
世服皎靚飾脂效姝嗜腥豢醇溲甘芼莢維爾茹口哆焉如茶耿持空榛曷知
我蕪叟曰好不可一鴟鴞螂蛆鉤以爲直石以爲琚變奪五采睢睢盱盱已或
自售適增詆誣寄懷於言觴至不餘九九默操嗒然遽廬我生之辰天清景舒
庸采以修庶其遂初山空無塵白雲在裾歸與歸與吾以子爲徒與

墨竹賦

屹書林之邃清襲空翠以膏沐察羣芳之交妍糗紫芝而不肉化蒼烟於寸穎
皦森束其寒玉有客叩門指而言曰天天申申吾不知其親悃悃款款吾不知
其怨懼獨立之絜矜徒三劓以自獻爰有童子擁篲以前曰東南之美以植則
繁大盡斲採小爲烹煎曷扶其清孰床其生零西摧東山崩谷鳴取億及秭莫
知可名維我先生念茲磅礴探玄窟之太和布靈根於眇邈取方諸於承露和
不死之至藥寄遺跡於須臾避玄冥之饕虐故其凌風出塵廓兮如神承春飲

鮮從兮如雲疾掃卻顧猶歐冶之鑄郢人之斤也且客獨不觀夫鑑之與形媿
妍修纖各窮其精惟靜者能以燭至動而所謂詼譎變幻乃足以覈萬物之情
望南山之崔嵬目九日而不瞬匪好夸以眩奇良以解夫謏聞者之愠語未具
先生振衣坐忘與客相顧卷縑以酬一笑而去

素軒賦

太原白無咎徵名字于易復以素名軒實維其祥乞賦陳郡袁桷賦曰

維太初之混茫兮眇昭質其孰分二儀迭其交媾兮肇清濁而成文翕九垓其
同風兮佩鉤矩以播芬邈焉黃唐之仁聲兮極黼黻以成憲忠與質其相環兮
迄蒼姬而莫變亘終古之同軌兮成後來者之過眩徵載籍於竹簡兮淳風鬱
然以未墜憫太和之淪胥兮希絜己以自致三熏沐而揚靈兮儼前聖之遺旨
悟宣尼之自筮兮絲告之以不樂曰丹漆不文兮白玉不琢質不可以受飾兮
道不可以雜敦厚靜止兮弗居其華惟無色而自色兮物莫能與之加爰錫名
以表厲兮雖顛越其靡宅凜世垢之泆忍兮斲旁證以冀直聃演言以清淨兮

戒目盲於五色墨諄諄以兼愛兮悲焚如其何益冕朱裏而外玄兮袞襲裘而
不裼淡玄酒之無和兮輅盡誠而越席顏執仁以不違兮炯虛室之內煥商舉
隅而起予兮懼絜矜夫倩盼噫童子之微言兮警曾氏之華睨捨沐浴以孤泣
兮兆有知夫孝子乘結駟以夸容兮終內熱而頹愧車美澤而可鑑兮曷栖栖
夫靡止彼馬師之食藝兮亦能遺玄黃而洞理羌若人之好修兮妬芳澤之日
恣將乘飛廉以上征兮揚古帝之正則悃悃款款而彌貞兮固丹府之介特書
盤盂以參倚兮慮夫龜之不食揭嘉名于戶冊兮振白首以莫忒申以辭曰茫
茫重玄物之先兮剛柔相摩文以宣兮反初復真德乃全兮履素莫渝吾將以
無愆兮

冬窩賦

濟南潘仲德家商河治其田廬塊土纍石以處左經右子刻意厲行斟酌古昔
將力避世不復近歲終順陰陽之理慎居于中而名曰冬窩未幾聞于朝爲太
史屬太史職清簡仲德獨憂之復以昔日命名者揭以自警余聞異之爲之賦

曰

噫嘻夫世之善養名者豈惟冬與朝而興夕而趨執轡在手承塵滿裾僕夫告
痛寒冰厲鬚剽飛英於窻數巧膏沐而睢盱懼分忽之不前戒良哀以先驅矜
清揚之婉婉猶春溫而于于何自而冬乎大盜之智不以胠篋巧賈之利不以
操割蓋將足不超闕而踵接其席目不承色而議推其德美容峨峨雅言迤迤
爰處爰居載笑載歌闕無傳之靚邃又何爲乎冬窩也哉潘子曰不然冬爲天
終萬物蓋藏陽微如芒外枯內傷甲者若縮伏者若亡裂者爲阱凝者爲防歛
吸以吹浩溘莫當口含飛霜晚承流漿三光青熒五嶽仆僵故其蟄處也隆然
以龜深息而卑卑其徐行也蹙然據危俛僂而施施疏房上宮連氛累靄欽崆
阻深束縕以載鑿坏者遁煬竈者遜當此之時食不飽菽藿衣不襲裘鞞悻悻
然角進而憑陵將弗折而自缺且夫藏明養陽必謹其獨大智若辱大容若谷
紛載籍之蘊祕糅衆說之桎梏折精華以彊縫豐蔀屋之光燭吾非以崑巖爲
居鹿豕爲娛友幽闔而棄斯徒也念居蠖之未伸凜自縮而不憚謹清寧以冲

嗇御六氣之寇沴將以游乎萬物之初順四時而成歲也

榕軒賦

南粵之區溫風戛摩積炎吹雲流金爲波少負老息盼茲庭柯爰有弱木攀緣
嘉生連理纏結附枝膏凝蔭旋萬牛廣容專城千柱承宇百尋傲空羣焉莫爭
希賢同風長與少殊如叩如容溜微生於一髮寄豐壤而敷茸詎擁腫以丐全
眇頽波之容容厥類滋夥其名曰榕東魯先生見而笑之曰目無常形嫫母以
爲能耳無常聲折楊以爲清美醜相乘孰完其生眷茲連蜷棄諸同辭薪者鄙
之斲者訾之輪者絕之器者揮之夫好惡不齊莫與之爭吾何行焉舉觴以噫
噫極而歌歌曰木之詵詵匪委佗兮木之萋萋匪婆娑兮巧爲彼矢名爲彼戈
徂徠維松新甫維柏奈何奈何客有踵門而言曰議物產者必以良舍所用而
求無用將安所嚮先生曰多謀者神泣多才者形傷維彼阻窮百虐備嘗蔚然
以修充然以光四海立賢勿云其方窮髮之北殆將駭兮榕兮榕兮吾以爲楷

兮

復庵賦為恆山李謙父作

珍傲宋版印

揚子之衝千流交趨蔽帆雲凝炙穀雷噓塵奔瓦聯擁關蹋衢土衍隰勻深耒
廣會百技眩衰千賈獻殊爰有倦游之叟卜龜食吉構茲磨廡不斲不甃茹玉
芝而三咽膏玄髮以若漆與客瞰空觴而言曰今夫所謂歸老者其名鮮鮮其
行暖暖脫機於韓盧之吻息影于菟裘之巔造者絕屐奉者謝饋嘗仰屋以歎
感極以悻悻極而悔黯崦岷之吳離揚滄浪而莫贖若是者吾奚以為歸世有
習靜之士逃聲於無形避害於有名山鬼獨嘯悲猿凌兢掩耳疾匿脫焉如驚
是焉知天地之性哉磅礴之理不能以獨運慘者舒者疾者徐者足以窮萬物
之真維昔此邦犬牙東南前江右山朝煙夕嵐憑高而望則去者如箭淨者如
練杳者如線效者如獻日出而作連岡燒空交蘆舞風土臺崔嵬野田豐茸昔
之荒煙蔓草恍不知其處所寄遺蹤於白鳥問秋風於賓鴻夫觀萬不同恆維
其機今吾乞身於未老寄此土而食於斯也素書滿牀旨酒在卮鄰熙社恬子
順孫祗不脂不韋不激不靡視昔歸全而索隱者相去幾希靜者動之根息于

外者其內若焚川流徂東龍返爲雲日沈于淵朝升爲暎其本元元其生芸芸
蘭兮廬乎靚無渝乎又何懷乎土乎

擬剡亭賦

爲吳成季作

英英維祥織流成章雙峯嶽崑紫芝熒煌峙立澄冰玄言飛霜爰有化鶴之叟
迅翻珍館舒風盤霄歸而歌曰茲山兮沃膏陽霏兮夕濤吾還兮不崇朝將何
爲乎逍遙昔之命駕者興極而意已盡臥游膏肓者不千里而接軫去若隙駛
留若柯寄情不及親豈我輩之謂耶彼櫟輪困爰衍爰漑彼桂扶疎以嗣以賚
養苗者濯其嘉牧羊者去其害植楹兮鼈負布蕘兮鱗雅我季兮圉圉孫並曾
兮陳廡蹇獨余兮不留目凝睇兮屢顧芳菲菲兮在林誓將築兮奉所欽卜龜
兮于庭諏言兮揚靈彼簪兮奚投返真兮思冥學道者天完逸老者齡延順以
養榮息以固形刻意枯槁者吾猶謂之善盜而我之髣象豈果有所羨而自表
者耶道本於無名擬之而變成鉤深者泉如珠在淵遇風爲漪激流爲川彼剡
伊何源遠不遷則而企之於亘斯年

餘軒賦

爲程士安作

世有好名之士佩玉長裾鳴騶導衢候者接踵對者奉諛日三接而色喜坂九折而懷吁欠伸委蛇顧而子孫且言曰夷考昔人吾何能擬哉棖楹闕空旌旄樹霄部曲中街膏壤近郊悵兮屏營慨兮鬱陶若是者何翬翬也爰有靜士卑然素儒載尻爲輿游物之初粟不滿缶屢空泊如爰笑爰處擬諸華腴昔東方生見戲于侏儒翫世味道忘身之遽廬維程子客于江之南幾四十年幻者如飄風逝者如回淵禍生於公鯨罪成於細旃撫心以思孰省其愆往游于其軒太古爲春無懷爲年探圖宓戲受歷軒轅在易大畜剛止以育德日新而自足者也昔之至人道充以爲富聲出金石柳生其肘席不蔽坐飯不充糗今子之居酒時滿學蔬時滿把視昔之寔者溢且夥矣程子憮然曰吾誠夸矣

隱居圖賦

陳子築居唐奧之山復繪隱居圖撫其某水某丘之雅名署於其旁以寓朝夕不忘之意每遇佳客輒指以示若挽而使之游從於其間也間謂袁桷曰夫畫

以髣境畫之所不能及者吾雖知之而不能數與人言之且境必有趣趣之精華非言不傳也子其爲我撫名以發其趣楠對不敢辭乃爲之賦曰

陳子倦游江湖整轅言旋顧瞻先廬徜徉里門四壁寒寂頽然維藩詢閩閩之遺跡儼中堂之猶存弔零落之舊叟撫徬徨之驚魂於是悲極而喜喜極復悟悟而言曰人生一世惟靜者智感不可持翫不可恃三家之市其行跂跂四達之衢其言姝姝一以巧爲媒一以醜爲居吾懼其獨立而誰與趨拂龜以占兆於唐山之隅若質而華若翳而明缺者如玦環者如城相其陰陽築室繩繩被以杉松澹以芟菱棄塵世之喧啾牖乾坤之清明爰命雅客展以輕冰之楮化以五采之穎纖濃如春曲直若領吐秀獻奇發牘炯炯鄰輞川之清妍敵草堂之幽靚故雖踰江越嶠適市造朝挹此粲者神凝吝消有不待北山之移入公之招也客有言者曰擁裘而歌者意率類於慨慷登高而賦者事常失於荒唐吾敢按夫子之圖而代言其詳東越之區山水冠世發抉地靈前王後謝維君之居敞若神界若乃石塘界其前雷峯守其要馬領冠其顛羊巖負其奧周以

青鮮橫以磊砢近若迎笑遠若卻坐欽蓄何山挾輶以殿浮游闔峯振弁以見
上有石屋梁欂參屬紛披寒苔聯絡怪木恍飛仙之遺跡鑿幽竇以守獨前林
杳靄丹光騰天伯陽一去而不返玄鶴盤空而將還飲石室之寒露問山人之
何年然此特隱居之外美析而舉之有不可勝言者矣晴原漲春千桃爛雲飛
英滿溪織流成文支寒藤之瘦骨度略約之微險解瓢斟泉一舉三咽藹桑麻
之故交爭聚首而繾綣前有惠林濃綠婀娜投冠解襟脩然清夏欣眾葉之敷
陰訝楞梅之吐火秋畦離離黃菊爛斑爰泛黍酒駐茲頽顏懷千古之處士醉
悠然之南山歲窮境空長木號風寒岑晃曜巋然中峯滯膏溢銀噴如飛龍匯
爲澄潭窮髮鑿容烹以碧玉之鼎淪以雲腴之茗神清意寒語爽心冷蓋將忘
塵世之事而深以內省也相彼雙門圍茲羣山清風常來客去不關圖書自娛
鄰社莫干有堂寬閒扁茲嘉名悼白雲之何往悲先友之日零瓊樓舞空清曉
萬變默坐以觀翕忽詭幻賓天衢之出日駭青紅之紛眩烏衝煙而辭枝兔驚
林而絕坂嶺濛濛而人度露溥溥而葉顛念哀鴻之相求時遺我以好音緣小

墅之橫岡花竹儼其成陰悵舉世之莫從歌風雨之苦吟乃歌曰歲將晏兮莫
留過故居兮懷憂山陂陀兮四屬吾拮据兮以屋懼世德之顛隕兮習肥遯以
盡穀駕余驂兮屏營耕石田兮腹果究出處之何心兮幸余髮之未化爲我語
山中之人兮吾將歸老于其下

清容居士集卷第一

清容居士集卷第二

元 袁 桷 撰

騷辭附

愍誓哀謝先生

受穆清之元陽兮一精白以抗修閭闔駸駸其初麗兮執正辭以告猷黯朱光
而不燭兮妖羣立以縱恣飾詩禮以逞誣兮曰余將焉所詣胸臆結約而莫達
兮史告之以寡言心屏營以靡置兮導旆旆而爲之先揭德華之魁壘兮勵來
者之不前一成旅以興邦兮佻然莫余敢擬州纍纍以十百兮夫何寬衣而廣
袂燃積薪以逞安兮羣豢食而自戲竭精液復疾呼兮卒莫能進其詞振飄風
於林籟兮葉脫故而懷新衆喁喁以雜居兮蹇獨立而號呻矢危忱於帝闈兮
星委地以如珮何執愚之慎矜兮守隘說於顛沛持空薄之一髮兮振千鈞於
層冰力弗勝而殆兮猶夸夫守道之經企女紀之傾輪兮極迅翼以恣往九疑
靈妃慘玉容兮鏗鼓瑟其音蕩重華倏焉以冥邈兮凜舊德之日喪乘桴游於

中流兮海若息波以竚望棹夷猶而靡行兮羌何爲乎此路晷然揚靈窮晦冥
兮朱鬣乘旗挾以震怒澎湃蕩簸激回渦兮爰深逝以歔歔懷縮慙而失據兮
寧忍歸夫故居死無能終報兮生莫知其曷圖貴化人之冲漠兮絜肥遯以自
遜蒙垢紛爲汙濁兮薄日月之吐吞整門竇於荒滅兮屏精明以黜聞超飛霞
而上征兮遇武夷之神君逝者翳于山丘兮夸誕逐其營魂覽三聖之古簡兮
宣尼實爲之彌縫謂道無古今兮孰與之傳虛九九而內明兮剛柔錯焉以敷
宣翫朝步之奇文兮握奇五以黜煩建中極而滅端兮成品物之自然湛然一
以貫兮曷知其後先數京垓以成變兮迎拒之而莫偏斂莫知其跡兮爲道之
全夫形旣不可以久擅兮神與之爲橐籥迫朝逐而日騁兮引正命以自絕棘
棧棧于車道兮精離榦以蕭屑秋陰慳其淒骨兮熠螢光之明滅手三秀而不
忍茹兮腹殷殷其雷裂奄兮愀兮忽以放逸兮何昭昭其章徹 亂曰元神凌
兢兮命壽不得長闡茸曼衍兮旣樂且康衆皆馴帖兮靈胡然而秉方擷雲英
兮微光佩雜芳兮彌章駕赤鯨兮騰驤絕六虛兮放八荒注北斗爲漿兮內熱

不敢嘗林有桂蘭兮水有鱣魴所思弗見兮奚故鄉絜眇風兮樂未央吁嗟逆
化兮何怛傷

廣招

深寧先生乘虬上征江海殄瘁湘纍遺痛千載猶一日也柳車爰行瞻望永隔
門人袁桷竊取宋玉招魂述廣招以反其義其詞曰

竊獨悲此翳濁兮身鞠恧而莫明服三后之貞則兮秉忠純以內兢繩古義以
自抗兮懷微躬之莫勝懼天命之不吾與兮晚更號以深寧委靈魄於玄宅兮
挾清神以上征重華慘其無容兮矚下矩之險隘侈九夷之曠邈兮申前聖之
遺戒一去而莫返兮八靈孰能以震馘乃命小臣戴縱秉旄注精高冥而下招
曰茫茫封丘屬豕萃只炳靈奔飛杳交會只嬋媯清芬孰返旆只縱橫幽房雜
厖怪只魂兮歸來其益以駭只東門熒煌平蕪層陰只靈宮紫芝萎以泯只流
鈴搖空訴夸淫只玄蛇蒼鼠若擾馴只魂兮歸來激越吟只蹠踐蹂躪白蟬飛
只滅方鑿迂傳致以肥只鬪青綴白眩纖奇只折楊黃華司體儀只魂兮歸來

彼相疑只沃隰修畛鞠薺茂只狂夫冶游胡慳後只南山白石曷以永年只式
擷其薇悵周原只歸來歸來其孰能寐魂只愁雲旋宇陰籟振幕只素空霏塵
清晝激霰只虎雖黃目屏陳設只精鑿後置燻蠹施張只伊鳴仰天雜猖狂只
甘胥恣睢禮不可防只魂兮歸來悉無以當只魂兮乘桴登瀛壖只海觀日浴
爛紅殷只皙容長裾襲古先只漆書竹簡遂研鑽只崑崙穹隆疑有至人只妙
顏紫蕤休德日新只吐珍納和與道爲鄰只雕題祝髮禮讓興仁只桂蠹咀吞
味芳辛只幽蘅嘉芷佩孔文只相羊湘纍脗若存只承挹清塵徘徊翩翩只天
光淳耀會弁森扈只肅容展威受多祐只斬凡破觚斯黃輔只龍圖昭回布高
矩只開陰蔽陽庶類蕃嘉只捫歷箕尾建崇牙只翦理姦巫靜無譁只照示下
土循義媧只河公海神瑰以迅只貝宮鮫室祕怪雜孕只瓊英琪柯錯續紛只
鞭龍誅蛟霈澤湛潤只魂兮遠游戢凌紊只揚歌舒嘯化幽憤只重曰嗟所思
之不得見兮儼冰雪之遺容緊遲遲而容與兮松柏日其蔥蘢悵幢帷之咫尺
兮長虬脫焉以追風蛻塵居之險艱兮捨崇蘭之新封墳篋迭其和奏兮聯雲

車以陪乘粲琳琅之遺編兮俾泯絕之足證匪離羣以自絜兮誠不忍夫驚駢
超整駕以言從兮懼見譏乎後聖揖虛漠而言旋兮耕書田以振厲諒神明不
吾欺兮庶終承乎嘉惠千秋兮靡長白雲兮相望魂兮歸來其毋我忘也

七觀

翰林先生納榮息機謝白玉之堂將歸于麻源之山房越公孫懷牘濡穎託物
喻志考圖審曲若鑑之納視言忘而意消類別而理備有郢大夫癯然褐衣目
不接乎黼黻耳無聞於律呂鞭而言曰登高能賦淫曼荒忽智專者魂強形滯
者物逐昔吳州來觀詩東魯言有度徵有據厲階於枚生濫觴於曹王先生楚
產也雲夢汗漫巫峽巒岫藏腹蟠公孫不足以教我先生殺青南山積簡羽
陵若網有網若墨有繩舉凡暢微我其聆諸

越公孫曰太素烟煜清濁奠儀兩風露雷動植攸孳辨方審良民用不疵六氣
以涉日天其世彼諄諄者皇曰汝命實長厥土燥剛相其溫涼我生命在天順
以受年巖居谷飲中道以隕執書以觀有涕汎瀾陋彭鏗之逆理兮何恣縱而

益顏言技可以進道兮吾當由是以返觀納腸補藏憚忍莫竟石立土踊孛慧
逆吾猶以爲天地之病也修身俟命道之大經先生之正也大夫曰神之所
行何體何方拘者爲儒請更端以告僕夫

越公孫曰靈曜宣精五紀順明察幽考微法天以行形氣芸芸吉凶卑高觀象
以分韜兮靈根感不以言由動彰靜百神受祜虛者爲音質者爲數昔后稷氏
之職黍稷藁藁智者過謀胡盡其地力民日作慝相攸食墨風雨斯蔽連雲岌
嶮飛不得垂喙履不敢仰視旁營萬家地記萌芽赭衣僨蹶而淮水復絕鑄鼎
伏姦能沈于淵吁嗟而求桑林之羞要荒擾馴王會盈庭獻琛效珍物不可枚
陳雞豚以時父恬孫嬉何助邊蔑思屈曲洲島家累千金資先生昔居列仙之
館據要集思謂象以理明妖由人興守諄芒法清寧卻走馬于郊謝重譯之雉
陋三脊之茅熙熙陶陶舒舒天天不言而歲成無營而事貞夫子不云乎一致
而百慮其是之謂乎郢大夫曰汎觀博聞於道彌損願滌耳以挾其蘊

越公孫曰粵昔尼父唯俎豆是數擊刺坐作因民以教蒐苗獮狩車徒卒究厥

今輿圖八表同歷四貉交軌月竈風丘冰天桂海馳心望雲請命款塞千廬星
環八屯山列羽林繙經飛騎鼓笈然而樂成者難與圖事守文者不足語智嘗
聞之兵農同封耕戰同功魚鱗雁行敵莫我敢當府散籍移萬姓流離強帥拉
脇外寇憚肌卒不可拄支後王鑒觀法日以繁厲者罷者恆者羸者駢頭引吮
食粟而嬉開門納兵百郡是師何草廬高吟崎嶇雜耕何杜氏之子傳癖孔深
而緩帶以征射以容觀劍以氣言批亢擣虛孰知其隅折衝壓難莫窮其畔至
若握玄圖視龜文縱橫起止與易象相表裏者驟語之吾懼大夫之竦眙也大
夫曰兵者不祥之器未效此知也

越公孫曰炳靈心君闢乾闥坤情聲相宣立度出均昭昭鴻藻緗縹是存敢先
論楚材而言之漻漻乎形畏垢而將翫也罪罪乎暎承露而欲訴也荒蹊斷葦
燐滅沒而凝聚也織文揚徽攬芳菲而雜組也少焉商飆號鳴金石琮琤逐虎
搏兇韓鷲鏃鷹寄莽蒼於一瞬乘扶搖以孤征終緩轡以就日愴倏淪乎西傾
噫悲何爲哉古有巖居之士抱奇挾幽漱芳深林憩寂凍流愴乎其若遺窈兮

其若留鉤盤助之爲回旋虛牝答之爲獻酬猿三疊而墮淚鶴九轉而凝愁鉤
玄採微迄無終窮瑤席敷張高歌慨慷語初麗而終放託餘韻於宮商然此其
淺淺者耳擗拾蒼雅刮磨誥盤微粲貝編飛英露溥何譏乎肉食之鄙猶鄭穆
而魯桓也大夫不聞之乎鍾石絲竹各隨其聽隆汙有時其所遭者命摩盪堪
輿吸呼羲娥矢爲帝詞叶爲賡歌五嶽贊襄百靈護呵不棘不茨如砥如磨發
潛漏泉掖民陽春瑰逸爲新簡絜爲真列若戶居別若渭分雍容者珩璜沖遠
者英莖縷絕而緒續醴甘而齊清昔之擅名偉著耿兮其不能以十百程也浮
聲切響直意肆志澎湃訇溘滔滔莫止据理者夸飾言者哇嫫母兮姑射鉛刀
兮鏌鄒嘗莫任兮奈何大夫曰文章與政通玉署之職也文勝質則史更言其
大者

越公孫曰矻矻中壘校讎靡寧世本年紀繫于麟經捨相府圖書泯其緯經炳
麟金匱汙敢配乃司馬氏決榛鋤翳麗者爲譏激者爲刺升涉世家表籍作
紀言諸侯無史史立周圯鄙儒畫墁削章刪凡燭火並日卒澌盡莫傳昂昂荀

袁辭約義完何班范家至耿光綿綿相繼擬述百世一律素王簡編如日在天
熒煌高張孰敢附肩鴻化以濟研探益疲穢者闡者濫者泐泐畏禍希企
市價詔不表直俚不師雅若鼙鼓鍾若盲策馬元經附訛唐歷受呵後有紀略
迄莫同科尹石猛志證古比事百不一試歐陽氏出方名山所藏復大同而小
異勢不兩立其魯史之謂厥今繫牒川盈記注櫛比故志存廢與之源典章酌
損益之致登瑤山而神駭游鄧林而目眯般倅效吁隨和發涕操觚之士吾將
見其心赧而神悸也先生登秘丘覽羣玉積石倉標朱目墨兵筆削融液乎粹
精囿赫胥鄰大庭大夫宜從下風而乞靈也大夫曰皇王惟熙帝霸孔熾我心
增悲韓愈不爲史名以四馳何庸知焉

越公孫曰煌煌古帝別生聚方煥乎陶唐五服正邦五典率常導之無違民用
熙熙授之以時聿來孜孜降于三王厥緒曰孳集成于蒼姬黼黻憲章金石命
令緝熙太和宣昭羣姓纖鉅之備粲乎其有秩也豐殺之制屹乎其有截也三
光重輝百辟拱列歲時易移而浸淫蘗芽弱者綴旒強者鋌戈智者探囊勇者

拔河搏犀象屠蛟鼉飛矢請命旁午係車焱乎浮雲迅乎奔塵炙轂滑稽之士
紛然而並陳棄仁恩假鬼神混君臣各馳騁而懷新數千百年人亡而說具勞
乎離婁不足以一視也齎乎王良不足以一御也其最大可病者恬泊守真可
以養身不可以治民絕性棄命黔首蠢病孟軻氏有作吾見其髡鉗而舌咋也
言未既郢大夫曰天藏山中瑾瑜匿瑕問以辨之厥德日華儒者詬病卒不能
以勝何道最高子盍陳之毋激毋勦

越公孫曰古昔顓童受業閭塾書數首通訓故是屬聲歌象舞目接身服相親
有恆日用不瀆後帝不相襲緣祀興文八音寥寥五禮紘紘鏗鏘莫明而聚訟
若焚鄭說乖誤後圖踵循象制益湮周官別出議者欲一繁紊綜錯操網而入
林適越而轅北也類禮孔勤五厄莫存後有倣補去取未就卒乘虬驂雲字以
文合聲以音比旁行敷落侏離狄鞮文軌同風不能以一致孔壁莫推二經蕃
靡聲牙爲今簡儷爲古謂道統是傳曷敢有語詩基文王而周召先興首章異
同衆說沸騰風雅變言美者爲訾直者爲詆魯頌紀異秦誓告終何後學膏膏

迄莫之通麟麟魯經議口法吏謂齊晉無裒而日月具刺紛若蠶蝟眇若糠秕
不虛其心不明厥視遺珠抱疑探篋積毀然此特人文之經緯政治之用體也
三聖述作包河總洛二儀生於心萬化制乎神迎之而莫親拒之而彌存疑者
遜者愕者困者湛兮消兮委兮昭兮沈思遺物形離超兮激迴颯兮闐而寥兮
縱雲翱兮愴兮儒先從我招兮郢大夫曰始吾見公孫疲欲若不足突梯若避
辱靡精槁神何斷斷然也今知子矣永譽處矣吾與翰林先生徜徉此土小年
大年猶以爲朝暮也

梅不佞遺諫守儒號東南故家志學之歲先子命繕治書錄觀史志略錄
部第時見舛雜稍長得博考先賢藏書總目矻矻三十年合傳短長乃成
一家承旨程公作藏書山房于麻源三谷命梅賦之遂作七
觀極道源委延祐三年歲在丙辰七月癸丑會稽袁梅誌

嶽麓圖辭 二章

嶽司南兮齊紫冥懋陽德兮炳靈二老兮素葦握鴻濛兮矢詞百泉兮一谷醜
爲川兮爲瀆玉霏霏兮日光湛淵默兮含章至言兮在圖同八方兮遂初重華
逝兮不返晝猿啼兮虎當坂

望臺兮靡蕪蹇一士兮拮据百楹兮承宇嶠山瓢兮以爲醕松風泠兮琅琅儼
振佩兮高岡朱羲出兮揚靈積陰伏兮大明百泉飲兮在齒懷交流兮不可以
止嗣德兮孔艱清徵激兮回瀾

悠然閣辭

鄙之西兮峯圍圍虎豹屹兮雄姿綬蜿蜒兮紫屬旌駸駸兮虹垂之人兮槃阿
畏羲娥兮高駝築榮觀兮通明手參差兮以娛棟隆兮示背榮翼兮聳喙鑑匯
雪兮鄙之區揀有七兮日颺採鞠兮黃裳緝萸兮紫囊芳冥冥兮夕暉愴獨睇
兮擬所思雲飛英兮山之阜爲予留兮不遐以處秉貞兮神專觴彌劇兮益完
山中之樂不可以久遲予返兮悠然

楊堅州治孟津金堤成作金堤辭

波湯湯齧我堤民昏墊晝負攜地不寧緣木棲楊侯之來承帝則順事陰氣神
以懌赤蛇蜿蜒吸桂漿百谷受令故瀆常彼隰柔桑猗澤維杭侯言神綏曷敢
功民言侯績天心通百妖伏精金石宣明三旬有役金堤是復

石田山房辭

大梁馬伯庸寓居光州作石田山房爲作辭曰
淮斂波兮練繒峯植秀兮翠旌翦黃榛兮布耕石彘彘兮稜稜思夫人兮造攻
雲電合兮追鋒遺鏃兮齧足壤逸休兮果腹神符一兮告祺藹惠則兮貽思靈
之來兮歲祠不鄙夷兮以嬉疏房兮筍席溫風至兮靚密儼竹素兮橫陳曰靜
修兮手澤世芬兮日起百稔兮無斃石田兮有秋累胼胝兮吾奚以愁謹樹藝
以自勗兮植先德兮無媮離本兮穎豐導泉兮澮通夫豈不知有善歲兮吾曷
敢燕遨以幸逢望八公兮巖巖王孫悄兮莫還積荒幻以自迷兮捨息土而弗
芟衆芳婉其披離兮秋霜慘不能以實謝紫芝之療飢兮治精鑿以煉質亂曰
苗誦誦兮善吾耘兮日出作兮永裕樂兮學猶殖兮吾將以爲則兮

雪江圖辭

雲玄積兮素摩挽義車兮馮河蘆戢戢兮倒戈岡伏匿兮鸚鵡昭朗兮夕徹羣
動寂兮影滅超逍遙兮一舸食穀精兮腹羸地險兮曷憑馬飲波兮夜騰委素

練兮宇清舉皓首兮吾奚以屏營

垂綸亭辭為宋誠父作

漢滔滔兮日傾東滄浪兮泠泠蹇一士兮沈冥垂芒鉞兮不屑以昏明玕兮貝
宮朱蔚兮青蔥魚戢鱗以為衛兮龍騰章以屏氣謝媚媵之嘗巧兮口垂沫以
縱恣吾寧養之以歲年兮寶祕鬱而不宣豈直鉤以違眾兮守釣道之自然時
至而迅舉兮匪荒幻之詭誘保貞志以遂初兮考銘言于耆叟世俗眇其莫同
兮永訖依夫前聖之所究

巨峯辭為吳成季作

千嶂兮嶽崑特峯挺兮絕垠泉交流兮織文粲霄臺兮鱗鱗檜節兮松燾接路
兮以邀儼至人兮清寥休德新兮日昭神曾舉兮重玄大帝儼兮授簡以宣曰
渾沌其無迹兮孰為之傳氣積兮九乾五緯從兮右旋逆知來兮順以往握靈
機兮測天狀葆正命兮滅企妄受帝語兮還神京山之下兮雲亭亭澹獨樂兮
復丁則泰始兮道甫成

雲中辭

氣芒忽兮孰窮其升淵迴旋兮挾以騰圓爲輪兮直者繩握斂散兮莫名山之
椒兮日暎彼獨黯兮上屯從豐隆兮駿奔需不進兮昏昏下土兮垢氛靈夷猶
兮曷存炯余視兮屏息桂酒酌兮瑤席法玄化兮以康食神功昭兮奚以跡衆
甫集兮粹精愴將逝兮廓清

春雨辭

玄陰固兮內凝滄蒼蔚兮溟沐興注兮建瓴疾兮灑兵下土兮沃焦蹇徜徉兮
紫霄來弗以趾兮去莫可招澹幽士兮空山息視聽兮玉顏帝青廓兮籟沈虛
牝汨兮潺湲謂彼有聲兮耳益以聵疑不釋兮詢于大塊

義婦辭

東平孫珪妻盧氏

彼煒煌煌兮過者式之黯予心之初兮孰或測之紡兮于房伊雛孔傷饋兮于
堂我姑永望余不聊生兮矢神告之歲月遷流兮卒乃復之鸞鏘兮飛鵠松柏
茂兮朝露沐石可泐兮志莫虧儼舜英兮介壽祺

哀蘭操

盱江吳允文咸淳末與家君同佐江東幕府允文慷慨喜論功業倚青溪
檻張髯頓足籌邊事歷歷在口傲視府公每一至賓次席甫坐卽去督府
舟抵龍灣金陵郡文武郊迎謁入皆謝不納獨允文立江亭掩袂大慟必
求見始退未幾以王宮教授召方是時江淮幕府僚佐言性命道德者悉
詭號爲知兵得入朝言事而允文疇昔素論兵尤奇偉可聽故得驟遷爲
起居郎復直舍人院流離南方寓虔州時文丞相總兵兵浸弱允文復以
平時論兵丞相獨傾下之兵日迫丞相酒酣與允文論生死允文未及答
丞相呼軍校斬之噫允文要爲奇男子其未答也抑將有所爲也楠九歲
時嘗拜允文於家君坐上想其風采凜凜猶有生氣今觀所作墨蘭不自
知其悲之無從也作哀蘭操以矢之暇日當弄絃繹聲以配易水之悲壯
幽蘭兮秋風炯命兮不逢剡剡兮素蕤零露裊兮莫持望崇岡兮不得返悵江
南兮愈遠叢棘兮彘彘欲駕兮無轅子中野兮屏營芳隕失兮玉零謂我爲非

兮吾何辭已兮已兮其將何之幽蘭兮勿悲生失據兮死有期思夫君兮意極
從逆化兮何蘄

蘭竹操

爲子昂作

柔者不卑剛者不凌質質雪霜心兮以寧且清噫招過學恭吾曷敢以從
彼高者矧彼俯者積各全以生不媚奚隱尋不可以枉寸能有所長亦獨何心
茲奚以傷

芟芟兮叢棘高者下兮曲者直揚靈兮靡慙介石兮誰瀆功成者去兮孰尸其
榮辱爲佩兮弗忍以刈爲杖兮弗忍以戕杖弗以扶危佩弗以服香其咎曷當
履維德基其無缺以自隳噫

黃可玉哀辭

孔子敘逸民所尚不同愛其近道吁是有感於世也耶又曰不得中行必也狂
狷乎狷者有所不取矣剛絜養正矯矯然離垢立奇語益不合行日以褊若是
者誠不取矣苟爲之不能知知之而自警者得一人焉曰南康黃先生可玉可

玉名石翁世儒家居廬山下少多疾父母強使爲道士讀聖人書能知其心謂道與言不可以有行也必藏智頽放以自養約結制行非介以爲異也其著書極於憂患者困之通也嘗曰曼容矜節支離不能也乎世易足吾何爲乎是空巖隱穴廓然契領至則曰游聲養名非士之實跂而望之去聖逾遠故其所爲詩文靜而不馳溢于哀忿則可玉自號之曰狷叟者其果知矣可玉所居室多唐宋雜蹟間疾作閉戶反復在手疾止危坐若思客至馳辨榮辱可玉閉目不復答而人始咎之嘗與余言吾鄉善醫曰劉開能已奇疾里人病噎嘔藥不愈劉往視之云廬山某日雲氣開君憑軒眺引之當愈後卒如其言余少固多疾今疾益劇不知用劉治法可已否相視大笑余來京師報事言茅山陶公黃庭出可急購購成當同議中黃畢法未幾竟以疾死嗚呼可玉言幾六十死矣曷哀也已學老子道志於壽余不志爾謂其世無似而哀者亦介之的也伯玉砥礪志節歲久益湮讀其自爲銘知可哀也已故爲作哀辭辭曰

朱光絜精受昭質兮煜煜靈根曷幽鬱兮鉤深索奇儼古聖兮德充以尊履制

行兮卹彼拱璧奠皇圖兮歲以爲隅衆引誣兮响俞突梯道之非兮挾轉以行
慎樞機兮層冰在蹊踐其絜兮幽蘭尤芳誠不敢裂兮清玄返真氣始升兮謝
彼菀濁超變騰兮空山闐虛蕙烝穀兮淦焉白雲從我招兮

林彥栗哀辭

道家言黜聰明去健羨形神始完是果爲得道耶古者上壽百二十歲竊不死
之說者則曰脩之益真其道彌親壽而無德與名君子恥之故脩短有命遺壽
焉猶可言也名德不至其澌盡腐滅又安所取哉古之人若是者衆矣永嘉林
寬字彥栗形癯而器溫其於學也汲汲然逐日以補有不足焉則力探簡冊以
自證其爲文必達於理而始精於詞謂詞者載理之具也理不足焉詞雖精無
益也深思以求之旁取傳記之說勦絕傳會據宗統原以會于一復懼其未盡
是也則祕重自念將周游四方闕疑廣聞目擊而心領焉噫若可謂勤也矣道
散於九流百家彌綸者至矣其弊有不勝言者汎濫俚雜尸坐瞠目漸入於無
聞之傳余嘗察彥栗知其心有深憂者焉余始見於姑蘇氣和以謙再見于京

師愀然以思取士之道非一巖畛域析毫髮有司者之過遺逸不舉則凡吾徒在官者誠有罪矣彥栗志不在是推彥栗之志在問學爲之而不克就若是者是真有命矣悲夫延祐六年三月卒于京師年十有 其弟宇友謹哭曰吾必奉喪歸姑蘇姑蘇吾先人所藏遂爲之辭以申其哀焉辭曰

氣清明兮受元陽德彌中兮闇以章挈太古兮儼九皇播絜精兮瓊圃芳力未具兮志則專一葦渺兮濟巨川慨不進兮道遠邇白晝速兮陰風旋數實紀兮吾何愆路孔脩兮神獨還靈旄翻兮木葉丹儼夫人兮在空山玉蓉冠兮紫佩蘭

玄教大宗師返真朝元歌九章以前導

雲飄飄丹臺何峇嶢中有授經之老顏不彫三光盪摩四時代謝神來歸靈承

帝罔敢替

謁珠庭

寥陽空洞六聖儼思九垓熙春羣黎受禧昔騰章閭闔通金書儼在水旱功

朝重華

五嶽奠形飛車揚鈴翔鸞騰晃金精下視垢濁何沈冥昔者之來運有遭今者之往清且遨

神虞娛

匪衢以乘匪車以征蓋葺兮摩旌洞簫激兮泠泠磅礴一氣兮冥冥精思道樞

玄雲駝

今跪頰聆
玉几差差文織成龍章鳳翥相緯經大言鴻濛小言毫銖道在瓦礫匪別區念昔人世我非娛

啓圖籥

煌煌文成厥胤嗣昌靈之紹合永貞陟降四紀心兢兢視彼成虧凜春冰高朗脫屣辭世榮

靈胄光

簡兮無言默兮若存生以不生爲根死以不死爲門絕學丕傳黜其知聞五千之言世永傳

握重玄

熙洽休明紫蕤朱英侍帝左右壽考寧啓祐玄緒何繩繩嗣昭代歲無害佩鏘鳴兮衣綵繚

昌期運

高維松層岩岩斂玉顏養金膏鍊形以昇朝帝青周流萬變鎮神京

珍做宋版印

佳城高

清容居士集卷第二

曾入世外此矣
正八美善及...
身...
...

立...
...

清容居士集卷第三

元 袁 桷 撰

古詩 四言

再從姪瑛幼孤學道龍虎山自傷不能鞠搆述祖德以勉之

煌煌元冑家越徙鄞隱道闕躬三世養真是生祥符觀光績文占籍浚儀佐邑

孔勤粵有光祿亦奉于越聿魁開封老守于栝少保恂恂卑退靜閱太保靈承

逃難乘筏大耋豁明閭里胥洽篤生衛公喬柯茂豐敦讓貽則攝獄自公絕蔓

秉仁千人著功冥報氤氲維垣錫崇於赫少傅受學族祖 諱覺有書解行於世正獻亦師之習

繹典謨正獻同字正獻首科少傅踵舉 正獻淳熙辛丑登第少傅次舉于鄉衛公夜夢神告曰汝子宜遲上南省甲辰

閩郡被黜淳熙丁未中復師以研繫我族父昭穆會稽非宗疇譜同源迢迢宴

堂是敘 少傅挽正獻詩曰宴堂相臣嫉忠同黨同錮 韓侂胄擅權正獻以太學

師且正學勃興象山武夷相繼登朝奉常羽儀維我少傅抱其魁竒曰經武有

亦廢 本日用不疲絕幣罷書感勵孜孜迺登東觀迺佐宰司歲為閣茂正肅冠廷 嘉定

甲戌正肅進士第一正獻祕監兼祭酒當是時越
公為祕丞兼樞密院檢詳越公登第已二十八年
正獻休休少傅繩繩載史纂

謨致事以行少傅作程均羸紀經翼翼京邑十載
救寧懷彼介狄迴戈指淮鐵

駟厖喧為厲之階公在宥密展誠弼諧悉卒宵征
拉其妖羶總戎輔京秉纛受

齊李全叛以同知樞密院浙西制置使姦沈于淵公歸在里徵彼壽俊縣車告止于時徵公及東陽葛公參政宣

公皆不至三公年皆近八十矣三啓公府永楚賜履復荒于齊終越以祀冢子廬陵克謹其承

曰惟瑞安儉不近名生我俊兄志學蜚英上試銓曹計偕薦膺余年尚孩企焉

戰兢女紀既蒙訖錄更符匪曰愚智阨窮同塗火焚高閎戚戚告瘖不敏其芸

莫植其居泯奄長夜盡然永徂念子之稚孔蕤孔朗不寧以餬俾游沈荒我雖

異途與汝同情無為夸淫無溺燕朋壹爾氣神履冰奉盈我宗匪微德芬匪沫

來者之榮逝者之戒沾沾懷新不究其敗鑒彼太素曷其有壞述我祖德送爾

言邁匪窮咏歌申以用誠

張孝子

汴張元綱之父為南陽屯丞母卒焉葬於府之南灘元綱痛不得復于里

銜悲茹辛縮板負土崇爲堂形尺以二十周廣之度十有二尋屹然而巍
望然而臺螯以陶甃堅靚慎密構亭于中以庥其神屏傭役躬畚築謂鞠
育之義由己而始盡於是暮年迺成河南田君秀撫事徵實謂楫俾有述

詩曰

粵若古先巢穴奠居齋齋其仁訖訖其愚返真元丘精糜魄枯如蛻斯登如穀
斯哺後王後民百幻具師顧瞻本初寧不爾思薰裡蓬穎惕焉表微歲月既遷
孰封以機窮慙恣華輟泣而夸力殫於民禮廢于家千夫丁丁逞巧莫譁風淫
雨饗卒爲泥沙嗟嗟小子內省是嗣維張孝子無貨財是恃無奔走是俾幸如
嶼如惟手拮据夕號其陰朝升其墟我心匪墜我力匪痛焦肺惕肝翳翳慈顏
曰天有命茲土是虔宛彼飛鳥亦集于原隱而卒之有阜孔堅魂床于所不畏
不侮汴水湯湯其流匪沮孤征云邁入此室處申以顯之以詔爾永慕

徐母表闋

大名徐夫人以節名于夫宗晚居錢塘有詔表闋江南於是其子大夫公

執憲東浙食豐享榮侈且至矣廣彤管之懿傳青簡之信春容整嚴執筆
林立四明袁桷廣為頌詩以備適人之採詩曰

婦道貴柔厥義彌剛柔以內施剛以外防煜煜秀芝空林自持永辭春榮三秀
何虧維魏徐母玉雪其躬端操靜閑凜焉高風念昔惇惇黃鵠孔悲婉彼孤雛
不能奮飛春條其桑秋勤其穡聿懷深憂世德靡忒漢嫠張芝斂卻駙馬黃髮
稜稜高秀里社蜀女周度斷髮表心矢言堅石厲躬鍛金沛有桓女少名其宗
援刀割耳之死莫從繫此三粲代表其閭垂裕莫聞靖言長吁桓桓大夫退食
自公擊鮮具甘是宴是崇勗哉大夫教忠于朝養和服寬慈令孔昭四海晏清
士節莫著歸為閭範陰教是助雙闕峨峨天澤所表維夫人節維大夫孝我庸
孔勤亦莫我敢效歌此擇辭永言申之過者必容四方其訓之

致樂堂

為鄱陽周南翁作

有嚴周門寢宇孔齊温其碩容西南有闈爰琢璧楹爾養爾承慎而絜清以燠
以明維大夫母柔恭俛壽嗟余季來教言孔懋木之彬彬視其同根有滄者雲

孰濟而升伯也于房仲氏中唐先子之淑翕焉以光我堂如跂我懷靡止載車以行不竦不倚周京斯弁旨甘有衍匪旨甘則怡樂且靡違彼堂在阿樹松峨峨黃髮番番童舞婆娑于以樂康於焉作歌

臺氏舞衣堂

彼崇者堂白雲中央蒼蒼維松舒泉湯湯有矜孔碩有醪孔芳差池東西率祖以行令德允修不震不侮孫曰吾祖祖曰吾父服其斑爛式歌且舞飲以大瓢爰擊其缶維咏維猶垂手以招有髡者髦彼雛天天永祈黃耆福祿宣昭左右承翼見其二毛厥居安矣亦既完矣樂時永清俾庶俾蕃肆其幼儀雖離桓桓宜爾雜服終焉考槃

古詩

五言

舟中雜詠十首

好花避車塵飛入黃河洗河流政茫茫一去不得底納汗有至道胡爲愛清泚念茲物理深玄籥從此啓

飛雁翔南雲避就端有得舊年春風歸雪花大如席陰陽眇難窺造物司其職
慎勿事炎涼來往任行役

道逢射生船有鶴馴且臞青絲閉其目病翼寒蕭疎皋禽九天來此豈真吾徒
獨憐羽毛似盤桓爲長吁

家奴拾枯草走兔來相親生來不識兔卻立驚其神行人笑彼拙歸來始嘖呻
乃知特幸脫未信吾奴仁

白葦生寒沙殘花搖敝帚燕都百萬家借爾作薪樵物微生最下功用迺堪取
大勝桃李花矜矜鬪妍醜

清夜視北斗正色搖我前迺知中州殊饒饒浪談天召公化南國美教來自燕
乾坤儻一致地氣何由偏

紙鳶帖晴空飛輪走盤線東風恣昂藏得意隨手轉攀雲政相喜墮地忽復怨
兒童豈知此得失終戀戀

惡馬少駕車駑馬多駕船駕船勿戚戚駕車何翩翩渠命有通塞誰能別媿妍

君看鹽車下淚隕如奔泉

春菘種北土三年變蔓菁一爲居養移自覺顏無情
南山植松苗深根定生苓
千年化豎魄豈比春菘榮

鷓鴣漾晴空意態極楚楚翻風蒼雪迴轉日爛銀舞盤旋傲飛鴻清遠敵凡羽
須臾下魚陂愧我覺疾去

車行二十八韻

乘車古云貴此意昔空羨河流露枯沙桑本接晴甸大車蓬蓬前小車鞿鞿殿
高緣縮先登卻立駭所見隆如龜戴殼縛如蠶裹繭效駕何昂昂帖耳復戀戀
高岡互回伏遠樹時隱見禪趺恣掀簸尸寢作瞑眩初疑肝膽傾漸覺手足顫
兩耳傳鳴雷雙眸瞥飛電縈迴蟻旋磨局促蟲負版氣奔驚七還心嘔復三咽
地軸從此翻日輪冑同轉軒輞怒交撞戚速急欲戰馬悲望雲嘶牛走見月喘
惡筆恣調伏詈語極鄙賤中宵不知勞亭午輒告倦揩摩髀消肉舍弃足成趼
齧斯朝飧薄重勝春醒酒土霧散游絲沙塵起飛麵咫尺方欲離頃刻已莫辨

素衣緇漸化玄髮白新變人言道途苦我意舟楫便雍容漸追昔麗縛時想緬
輓輪貴尊賢下足表置傳曳柴清時羞高蓋羣牧選況茲軌轍同及此寰宇徧
詩成記勞勩旅次時慰唁

錢王參議以風帆目力短江空歲年晚爲韻

澄觀學求道入景雲青紅上畏羲娥流鞭霆跨追風相知不在貌相見誰爲容
持此金石心坐閱寒暑中

昂昂萬斛舟浩蕩揚雲繆好風助其端瞬息千里颿層波激飛雪正色令愈嚴
坳堂覆楮水止足拘庸凡

昔年九方皋相馬不以目想其遺玄黃神氣洞馬腹東方有一士被髮羹不肉
居然使之來不復困邊幅

浮榮一羽輕至道萬鈞力達人固靈根清靜執寧極淒涼江海念別至勿戚戚
空餘好賢心一矢貫千的

魯聖勤經綸坐席常不暖事來非其意稅冕或恨晚每懷千歲憂百歲常苦短

扣牛有真理短褐歌石爛

機心起風雨平陸能成江苟非養其恬事至誰能降此心
皦明月爽氣通八窗
長空掃林莽寒颯助春撞

銅羹有至味易牙敢加豐醯鹽強調適衆口終難同澹泊本真情清淳豈纖容
一朝饗帝所祥雲藹晴空

文章工世姝此道非真詣有如東家施捧心學天麗公文雲雷尊落筆卽千歲
槩几生晴漪三沐古錦藉

平居挽士意寶鏡懸秋天清影閱今古寒光萃蚩妍淒涼塵土姿朗鑒勞評銓
相親耿無語相期欲忘年

雛鳳棲桐枝清音起冲遠英英異羣羽秀色日以婉詩書有真託我輩同一莞
深根在永閼衝霄未云晚

次韻虞伯生夜坐

炎晶爍草露木末望西顛靜躁誰爲尸翕忽紛寸抱志士法天運炳燭不在老

羣經固其郭積神以爲寶陋彼多言生希名太玄草山林詎心違歲月付幽討
擾擾徒爲名努力在此道

地氣環中州橐籥均宇內中宵炎溽頻露坐猶憤憤遠窮太古雪欲往終有徠
馳神極寥廓我筆不可載棲形竹素園萬化等歷塊相期江湖深慎勿寒暑礙
秋風起天末紉蘭結幽佩

次韻伯生

弱冠事墳典里曲譏涼涼螢燭不勝火矧敢扶朝光驅車出門交一粲逢清揚
曩尊實玄酒至饗不在觴慎勿飲世人徒令攬空腸紛紛五經學遠祖遺仲翔
知賢恨已晚相見復慨慷

至道縣日月無言炳陽秋辟世端有方低昂少淹留汲古理修綆寒泉漾清流
永懷魯兩生議禮終秉周我言失造次燥吻譚郊丘此悔行已止歸田賦宜休
空餘六籍意歲晚期冥摻

再次韻伯生兼簡仲章二首

重柳積清潤曉日疑蒼涼萬化同一氣斯須變朱光夙志尙幽隱清夢時悠揚
愧非酒中聖客至同覆觴委心理縑簡念至迴中腸時節忽已迅秋雲雁南翔
相期慎素業載歌慨以慷

俗士同酷暑可人似清秋邂逅得二子傾心爲渠留相望塵隕霧相親汗交流
積雨暗京國苔痕生道周神交徑心醉何必登糟丘著書君已定彈冠我當休
唯餘舊詩律支頤費雕擦

伯生詩律清遠少與之比嗟歎不足復次韻二首

皎皎明月裾美製異厖涼薄游起嘉譽妙選歸明光濡毫百王度麗思方抽揚
澡身佩璜琚慎德銘豆觴蕭艾不並處三嗅懷剛腸永愧斥鷃姿側身廁鵬翔
終然願胥附竭誠以慨慷

玄鶴警清露遠思凌高秋長松有佳蔭嚶然爲之留譬彼明月光那能染黃流
洋洋日以往天風迴不周畏此颯爽涼行當返浮丘同憂有奇士詩來賦歸休
遺經倘可理墜緒期旁撽

鞭馬圖

爲狄誠
父作

生駒萬里意所向知無前圉人忌其德未試先加鞭要令俛首馴使我常相憐
伯樂死已久此道不復傳駕車困泥塗伏櫪老歲年所用非所養誰能別蚩妍
畫師逐時好謂爾誠當然披圖重歎嗟我意何由宣

張希孟嘉慶圖

其祖伯祖皆
年過九十

舜泉清且甘歷山秀而朗淳風邈泠泠舊俗遺穰穰怡愉二老歡敦厖百歲長
銀光浮勝頰素髮垂過項階庭尊孝謹閭里化廉讓春風連理枝晴日九節杖
犢車共東西漁舫同上下蠶麻課餘閒豚韭隨薄養薇山悲首陽菊潭陋胡廣
愧彼非禮羅居然嬰世網孫枝孕天葩祖風躡遺響含飴記疇昔興門慰期獎
冥鴻天機韜喬松白雲往緬焉清風佳庶作高山仰

遊長春宮分韻得萊字

珠宮敞殊界積構中天臺神清歷倒景青紅隱蓬萊羣山助其雄袞袞從西來
八荒昔禹甸爲此增崔嵬舊邑環蟻垤清泉覆流盃雲低落日淨莽蒼同飛埃

緬懷古仙伯采芝雪韞璫長春豈酒國殺氣爲之迴天風起高寒玉珮聲徘徊
空餘水中輪歷錄環春雷之人去已久松聲有餘哀

次韻徐志友雜詠十首

師川樞密
五世孫

喬木空雪霜孤枿存十一遺聞備家乘零落寧有述文勝理固然相道返初質
志士心未降黽勉終惜日

刻志非不工畏修迺真怠勞生悟其機靜默希遠害棄觚強浮湛念至時永慨
佳人在空谷不復夸絕代

嘉賓秩初筵至饗不在酒傷哉囚飲徒醉目恣可不獨弦不成音短袂莫回肘
恃此百尺臺誰復憂蟻朽

至道存遺音我琴不堪撫愛此素心人更僕請遽數文章有正律短計工百沮
寡言徒自高憂熏汗如雨

盈盈道間花秀色爭餘春舉俗競愛之孤芳愧陳人譬彼鏡中月照影終有塵
八荒已同雲客行復跋踈

玩易悲三陳微服志已迫胡為守其恬正色養神宅迺知無邪詩經緯貫三百載籍天所扶終古脫五厄

古來操縵功時至能安絃近復顛倒之擊石求飛煙峨冠儼尸坐委蛇養修年廢此汗簡勞謂可一唯傳

談經各戶牖正道誰當承朝菌不知朔夏蟲復疑冰高堂屹崇構相彼甌與瓠師門有遺訓此語非吾能

豫章古詩法萬折江海偉層波激奇觀妙用安可幾妥語非不能萎蕪乃氣累東湖有真傳廊廟振朱屣

天風眇東南碧雲澹凝戀嗜芰同苦心相得不在見黃塵各道里玉雪起清遠宅年有飛鴻為我繫書箭

再次韻答仲章仲寶十首

東南有奇觀萬戶粲如一覽古幽思深擬筆追七述芳澤同聚塵清淨葆昭質所憂不可言凝睇悲落日

良苗沒深蕪稽人志其怠無端揚飛塵螟貳賈深害力耕未逢年歲晚空永慨
深悲采芝士卻穀全季代

春雲倚春山搖蕩如春酒相親在顏色念子心獨不薄飯時充腸短袖不掩肘
高樓政清歌盈盈自芳朽

驅車學遠游古劍終夜撫長安袂成雲我去何足數相知有奇士不畏道里阻
寒風振枯林落葉起清雨

西山鬱佳氣萬古留青春
露巖壑姿邀彼車上人
之人有行役莫浣車中塵
空餘白玉泉隨車走跋踈

長松養華滋陋彼霜霰迫虬枝結層陰下庇十畝宅擾擾區中人生歲寧滿百
慎勿以智夸相逢復相厄

新月無定姿低昂起初弦南飛有孤雁驚沙度疎煙一爲居養移來往忘歲年
感物非不多音書爲誰傳

束髮交老蒼道大誰能承澄心養真源寒泉護清冰傷哉注巧勞欲作千金瓴

豈無須臾好陶人愧非能

淵明仕浮湛投効志始偉愛此松菊佳餘年悵無幾八表雲鶴還不作身後累
陶然且就飲軒冕真弊屣

我家古城南喬木起清戀空江納雲影清夢時一見相逢故人深各念居止遠
他年東南來贈君以竹箭

三次韻酬周儀之虞伯生十首

英英雲中君含思歌太一迴鸞舞天葩流粲杳莫述報之不成章玉雪耿素質
臨風發長謠庸以永今日

昔學空巖君之人怒其怠哀猿雜山狄驚嘯欲我害天隱神所藏別之空悵慨
桃源闕深竇亦復知晉代

道逢學仙人御氣不飲酒我笑初無言彼已嗔我不哀哉守其愚繫石猶在肘
冥化隨悲風淪淪骨成朽

遠客思故園孤松爲誰撫露白天宇清鴻歸暮雲數誓將畢幽討勿爲此游沮

念子知我深神交泣天雨

楚歌惜白日燕歌蕩青春哀樂自逐時流幻區中人我生功名念素領無纖塵
飛鳶竟跼跼啄雀徒跋跋

羲娥挾雙輶冉冉老見迫丹臺漱靈霞瓊蕊生尺宅控搏無須臾詭幻已千百
慎此陰陽機逃虛脫真厄

奇樹生南薰清坐彈五弦淳風邈永古白雲赴蒼煙世故日以媮俛仰隨歲年
折腰倘爲酒猶足青簡傳

破瓴居井眉勺水不得承寒椽轉餘瀝天風助爲冰舊質儼有在誰言真破瓴
愧彼埏埴功成壞非汝能

龔生天天年苦節亦良偉輪困閱書傳此事寧有幾口腹非過謀形骸迺真累
所以商山翁終復著漢屣

少年恣青春歡至無復戀一爲關河行常恐不得見新雁雲中來飛飛落南遠
歸心耿無寐寒更促浮箭

題汴梁推官周子明三獄詩卷

三章結漢網清淨歌元元後世益以密姦悞日云繁治法如理絲衆禁政多端
一絲不得直萬緒何由完虛心納衆口至理藏片言永念死者哀更推生者寬
汴州古循吏三獄成平反天道詎幽遠于公有高門

題弋陽巖山精舍圖

紅塵落青山飛瀑遽洗之孕此巖中居寒膏濛淪漪白雲偉衣冠修松古鬚眉
書聲出虛牝杳杳空中篋桃源有神界天光固幽機一爲漁父游妙筆工研窺
至今武陵郡山水傳清暉

次韻仲章蔡村阻風

足弱辭北騎身輕落南航懷別意滉瀟問俗心悠揚豚韭供歲歉蠶麥扶時康
幽事不滿眼薄念時迴腸天風進蕭蕭海日懸涼涼喧厓土囊裂悵羨雲帆翔
衆樹失高下老鶴追微茫而我獨偃仄與子同阻長靜退實守道噪趨迺捐常
愛此金石貞詎爲道里忙相從果無悔後會誰當忘

次韻陳會齋七首

明月明年何處看爲韻

秋月如靜士炳然河漢明白雲護其清迸作飛空瓊此月不受彩卻行印中庭
白雲忽不見我思徒英英

靈魄表空輪隨陽產金玦須臾白璧成盈盈懼顛越陰陽環無端變化終未歇
獨恨今時人相忘舊時月

人言月有桂天風墮微馨開軒睇扶疎西與銀河傾桂本空中塵那能助虧盈
朗鑒自終古匪待今夕明

舊年客清秋望月如望年長身兀孤影哀鴻起清圓落葉墮我後北斗戴我前
勞生果有役念至心懸懸

海觀濯銀雪金精融太和照我身上衣光耀何其多感此萬里意逝將飲亡何
亡何豈真樂臨風託長歌

暝樹迴朝光驚鳥不知處羣動俱念安客行有程度熠燿驚宵征熒熒化餘腐
豈不畏跋履眠食在謹護

殘醒強清坐朔風生樹端
客袂何皎皎客扇何團團
念此會合意永與明月看
他年返舊壑願比青松完

蔣商卿敘其先人客金陵與先子事契末章復以見屬次韻

堂堂金陵州草草石臺路
羽書急星馳鋒車卻金錯
飛雲古戍基積雪寒沙步
我舟欲輕行我馬何踟顧
乃翁入門初此夕傾蓋故
寒暄謝浮語信宿陳薄具
茲年心尙孩維時歲云暮
艱虞脫九死邂逅欣再遇
貞姿固青松雅曲廢朱鷺
二老古先民百歲等童孺
微痾隔音容鉅痛割心腑
孤根擢遺肄淳敷悲弱羽
緬懷青氈舊力守韋編素
伊優笑侏儒咕囁陋章句
珥貂匪七葉插架同四庫
談空齊諧虛守樸燕說固
芳林極蒼蔚溟海窮混濩
迺知山中雲政異巖下趣
心聲要成律易象那可註
羣賢凜無幾餘子競自數
愛君思如泉愛君美如瓠
願爲汪汪深勿作翕翕附
巨構千礎承珍裘百狐聚
混世同鋪糟勞生已嘗醋
整冠儼初服拂衣謝紛務
溝斷寧繪幟戶樞詎爲蝨
情深盡傾倒醉劇多謬誤
忘機絕矜絜落筆化塵腐
水深嘉魚潛雲重樛木怒
翩翩林間鶴栖栖井中鮒

飄零記疇昔慷慨合和煦辱贈難與酬臨風復成賦

集廉園

芳菲廉家園換我塵中春古樹不受采白雲爲之賓中列萬寶枝天娜瑤池神
背立飲清露耿耿猩紅新幽蜂集佳吹炯鷺搖精銀層臺團松蓋其下疑有人
奔罷忽仙去飛花點枿茵高藤水蒼佩再摘誰爲紉濯纓及吾足照暎須眉真
暝色起孤鳥寒光蕩青蘋信美非故居整馬來城闥

次韻仲章杜門

今日慵出門尸坐觀我生忽有故園思寫之不成聲舍北兩朱櫻翠羽垂流纓
舍南青桐樹亭亭如蓋傾念此永契闊爲爾增拂嬰歸雲跂西山臨風意縱橫

暮歸

馬鳴千柳昏犬吠一星出晴空暗歸道客子塵滿骨入門視疎燈隱若眼中物
展書弗能誦浩氣彌碑兀古來惜陰士志有不黔突愧我非等倫顧影竦毛髮
寒風肅羣動勁氣激清樾飢烏念其安驚噪落林月迺知造化理壤壤殊未歇

贈黃教授歸閩中

壺山東銀筆秀色倚車蓋其人清且明十室九冠帶林鄭陳方劉祥雲布卿霽
緬惟乾淳初朝野實交泰執耳爲之盟多士森弁會澄懷味蘭芷正色炳蒼蔡
彌綸古編簡粲錯列文貝百川已東流末派擁溝澮飛霜隕喬木變脫等蟬蛻
艱難老文學世德芬未沫布袍黑鱗峴慘澹萬里外希音繹風雅一鼓瘖萬籟
宛彼孤飛鴻鳴聲何噦噦飢來念其安飲啄欣有賴涼風振修衢肅肅返征旆
懷賢不成章因之結長嘅

送許世茂歸武昌二首

其祖慶元大魁
先公嘗與同朝

岷江下奔流日夜東南趨艱虞六十載蜀客無完居纖修挂晴練五老爲之廬
招彼素心人蒼翠垂流珠峨峨銀臺公懷寶耿未攄青桐擢孫枝下此佳鳳雛
絢爛五采翼披霞表亨衢清音冥鴻遠逸興蒼鷹俱食竹戀苦志餐風養真腴
誓將八極周覽德爲貞符歲月諒有盡雲端復躊躇躊躇固吾事荏苒悲征途
蒼莽鸚鵡洲日落楓葉赤昂昂處士恨蔓草化爲碧之士輕且儇之人何急窄

至今千載下投筆弄鋒鏑銀城太古雪轉首一消釋雍容詩書郎浩氣裂金石
裴回登臨意寒波靜如席相逢各萬里末契論宿昔咿嚶語未盡征雁起暝色
淒涼衣冠聚山海窮畢弋翳翳桑榆光人物眇可識停驂望前坡去馬記初驛

題金華洞圖二首

巍巍靈居秀遙岑擁積霞聞昔受道時三洞爲其家金精裂飛魄躡武凌青華
遺彼一寸松樛柯養真芽瞬息服光景神丹起槎牙下有千歲詣百靈靜無譁
此豈甚祕之服食世所夸真凡路永隔輕生竟如麻

其二

五嶽扶神州

葛稚川地記言金華能避涿水之患

涿水胡爲魚茲山鎮無極不竦復不渝靜閱浩

劫理兩曜跳玄珠矯首二皇君寶冠白雲輿方瞳駐真盼濁垢紛何如罪煙聳
空翠滴露凝流蘇神鈞合虛牝松聲自笙竽竊兮忽不見諒此寧非居

送張上卿燎黃上塚

素質超昆侖瓊胎孕崆峒指木爲我母問玄爲我翁承暉企春榮百歲如捕風

朝暉何朗耀莫景何葱蘢返真紫虛臺合歡朱陵宮迴鸞從舞鳳景命來圓穹
妙感非世窺揚靈憺無蹤湛兮合冥會道一爲之宗沈沈白雲闕雙鶴鳴青松
念此不得見憊焉遲相從

壽何平章二首

方壺屹祥觀髣彼綠髮仙執簡朝帝居高演清淨言雲爲八表雨水作四瀆泉
炳文一以施握之不盈拳頰首陳至詞囊括希其全成虧匪至理願言葆真玄
琅琅黃石書功成迺言去豈不思濟時默焉念其素山中赤松柯云是童所樹
長養媚以深屈曲美無度神光滿澗谷希夷澹無慮願持一觴言眉壽在謹護

次韻雜詩五首

有客一馬歸屋角羣星明念此惜日苦羲輪何西傾粲粲風中花弱豔夸芳榮
而我獨枯槁欲學身後名

少年觀滄海天濤碧因依下有珊瑚株紅光射雲輝玩之不忍舍歛吸雙龍飛
遠爲塵中游坐覺顏色違哀哉西山士飢食周原薇

昔狂愛奇士接席多大言中道邂逅之捐生誓俱存傾家謝其意酒至絕不論此士今已矣長年常閉門

幽居集奇觀積雪明寢扉湛湛新陽舒寒光騁熹微呶囁南歸雁長鳴示其機出處諒有素觴來爲之揮

朝游東門曲壤道荆棘存纍纍者誰冢舉觴酌其魂死無落魄名生有咄喋言所以荷蓀翁臨流漱潺湲遺簪隱世德忍垢躬灌園豈忘輕肥念苟得誠少恩采采松上花飢來助吾餐

壽程內翰二首

蕩蕩長壽居丹梯峻蒼旻中有龜鶴所老仙爲之馴維時夏初至園林綠蓁蓁萬神峨冠環參差揚七均行雲鎮清樾靈波激層津振衣游帝青下土何其塵運與千歲期正色光景新無爲理清淨世儒汨其真君子法簡易坐致羲黃淳車蓋交道周嘉醕益在房有客東南來高歌奉清觴一歌白日還再歌青春揚師曠世固有八音盪翺翔迴鳳下奇雲猗桐非故岡覽之不食實三嗅遺孤芳

皎皎金石姿令德豫且康窮河覩崑山出日賓扶桑介此黃髮期因之結成章

別仲章

飄飄貢公綦遠乃至關河關河冰爲天積雪流銀沙前有林間鳥後有馬上笳
烏啼思我親笳鳴思我家川流去不息羣山赴嵯峨余行已東南朝醺散微霞
念茲日不見持觴酌餘嗟

別吳養浩十首

以願爲江海深勿
作益益淺爲韻

弧矢懸高門卓犖四海願登車透且遲永念道里遠雞鳴當宵行執轡上長坂
西北何其高飛雲列奇觀

游神竹素園古聖儼若思至道篤靜極執簡欲受之上有奇耦文摩盪光離離
持以禦魑魅魑魅不敢爲

維東匯爲湖浩漑通三江懷哉紫芝叟月明漱飛淙小言諒以清大言淳且龐
去去日未遠奔流鼓舂撞

昔聞方壺居誓欲往滄海操舟迅前邁雲雨白皚皚層瀾眇空洞肉翅不可待

朝陽漱靈霞一食毛髮改

古有無媒女閉門泣春深手擲雲錦梭流光耀晴陰千葩翠交結宛轉不可尋
浮雲爲之佇幽凰爲之吟

昌歎懷古辛在德不在物屈曲寒澗底詎以險自屈有客同嗜之至享寧勿勿
芳年匪淹留薄采消永鬱

雲和高岡桐龍腹裂冰雹攫之淳且深謾謾震寥廊彈者不復語往者誰可作
玄雲浮陰來開戶失雙鶴

緱山仙人居上有玉女盆解髮三沐之清冰盪寒紋神膏釋翠縷跪坐晞朝暎
蟬蛻有變化螻蛄安足論

客來南榮下欣言酌醞盜觴舉壺已空盤辟復三讓享之不成章何以爲客貺
客言君當休商聲助予悵

草茂木萋萋水勁石翦翦相思關梁深相對顏色淺停雲渺爲愁殺蒸可崇饌
食之寧永飢臨分復三咽

度淮寄養浩

竹清寒房靜殘月在西壁悄悄燈景微尸坐棄枕席井華飲蟾蜍玄雲成五色
明知非世謀精詣在六籍我行長淮浪凍樹挾春碧夢子白紵寬雙眸炯空激
書來婁在手此意何的的數面不成歡遠別迺復惻歸雁臨風翔先之寄深臆

懷伯生

春雨消路塵春風散林纈蕩蕩長安門客子千萬轍城陰有一士淡食羹不啜
采彼松上露煮石化晴雪沈冥護真性觴至那復說向來舌本談今作耳根熱
維南有樛枝巖溜滋百結在德良自防居屯詎爲折念此長夜深寒光吐殘月

酬蕭靜安提舉二首

溜泉散餘塵稍稍軒檻清孤鳳起天末縹緲參差鳴佳音寂萬籟異采含蜚英
衆葉豈不光終然哆春榮翩翩者何雛和之欲成聲迺知雲間意非復區中情
有客何方來贈以雙南金維時夏初溽寒光激玄陰至靜閱真賞獨晤諧希音
伊江渺風濤伊林復崎嶇出處各未得冥思結長吟於粲不能報泠泠手中琴

題劉充之載月圖

磊落太古月搖蕩湘君波寒晶爍膏露倒景流銀渦湛湛洲渚淨天風泛飛槎
晃蕩神界中四客歎且歌憑虛歷空洞金粟搖靈柯流光闕星斗怪影窺蛟鼉
服食詎在酒三咽顏爲酡俯仰會合初逝者已山阿昂昂菊間叟秉芳獨婆娑
微茫信可傳披圖重吟哦

壽賈參議二首

粲粲雪中松八表迴鸞翔下有采著叟澄觀振高岡握著玩鴻濛竹籟儼在旁
湛焉貫纍珠炳變猶龍章笑指青松言貞固以自防紈緼迺文化清雲表奇光
嘉平維吉辰初陽起天心彩鳳歛參差落落空洞音徘徊碧雲宇賓從羅清林
神鼎朝已調芳醴時當斟損益在我手啓齒歌瓊吟煌煌秉令德盼彼西山岑
次韻揭教授官閩中

鬱鬱太古樹叢生散珠玕明時炳陽德寥落歛歲寒天風西北來凍海翻層瀾
芳朽各有性盛衰詎無端貿貿冰上屨黯黯塵中冠宿志不得躡奮飛戢其翰

伊南蹇一士羈鴻河之干手持大雅篇八音佐王官牆陰臥朝日薄飯不滿槃
邂逅喜我同金石生肺肝出處非故意低徊耿相看閩山渺雲濤東望道三韓
居夷聖有在取琴爲君彈

寄題撫州先天觀

浩浩太古石雕鏤矜嵯峨瓊林化飛鸞寶構窮鬱羅矯首視三光丹青相盪摩
上鄰列仙館西移瑤池柯玉蛟亦受令鞭撻迴盤渦巍巍雙華表飛鳥不敢過
玄鶴時一來潛鱗淨無波心跡會虛湛神光隱鳴鼉緬彼巢居子疑睇佩女蘿
天風入紫京百靈莫誰何朗言渾沌後龍馬方負河視之杳不見嘉名表山阿
冥思有至理熟視時摩挲

送牟景陽教授天台

峨峨陵陽翁麟筆凝秋霜採芝空巖曲白雲以爲糧微言酌太古妙思歌瓊章
餘人涉其藩自謂真班揚此道端未泯我心何由降

五良秀高門用處各有在伯如幽蘭深仲若春雲藹叔也端可人芳林起新蕾

垂天得扶搖一決度江海相逢慰傾倒曾次澆磊塊

天台古儒林秀士英且明君行振遺緒家學揚清聲文詞尚理性此弊無由更
衆咻方爾羣獨拍何當鳴爲問舒與胡寒庭草青青闕風梅澗也

功名不願多我輩端可免南州已寥落屈指閱諸彥汰如糠在前得若車度坂
愛君不可留尊鱸慰佳願黃塵我何事寒燈起清歎

雲隱齋

油油山之椒翕忽變平陸下上何其勞一息返神谷凝光養澄觀清潤積新沐
知白吾未能寒聲起林木

劉朔齋侍郎孫希孟能琴欲訪子昂觀松雪琴以詩寄之

兩雪戒修塗苒苒歲云暮維舟望鄉國煙樹渺無度永懷松雪翁買田成隱趣
齋中六尺琴清徹仙掌露虛聲合空洞天籟生磬濩勿爲離鸞吟眉壽以保魯

詩有悼亡之感

送胡安常河南省員外郎

陽春惠澤廣蠕動回昭蘇皎皎尙書郎佐理勤居諸澄懷罄輸納疾首宣訃謨
黃流交道周髣髴桑柘墟驅馬憩枯礫詢彼壘上夫歌臺久寂歷商聲助清歛
昔有屠羊子慷慨成須臾感激車上禮朔風爲之吁俠氣散鋒鏑侈習翳榛蕪
舉觴酌其蹤興廢今何如三河水門記白粲來東吳願言表里道坐使民驩虞

次韻張秋泉墨蘭

虛窗秋思集晨興愴無餘墨池漾清泉天葩散紛敷愛此巖中君贈以碧玉腴
微雲解蒼佩縹緲疑空無遠謝丹白昏詎畏霜霰濡守黑志有在談玄道非殊
愧彼夷與齊絜腹不受污湘纍慨永古世人陋其迂臨風嗅餘清是豈真緇徒
迺知萬化寂妙巧窺分銖幽蜂綴疎蘂點點游晴虛閉門謹視之黃塵政紛如

清容居士集卷第四

元 袁 桷 撰

古詩

五言

夕佳亭

赤雲下平田層巒紫光凝疎鐘息萬籟晴湖淨奩冰倦翮戢已棲遊雲澹相承
吹簫者誰子空林起孤燈感彼金谷人怪石膠寒藤壯意恥未沒水涵風憑陵
亭亭玉浮圖百幻隨廢興振衣視天末黯澹銀河升朝曛詎異境氣寂念始澄
贈養源編修回嚴陵省墓

峇峇白雲阡翳翳青松居美蔭同靈根地易世愈疎清秋子胥濤縈紆達桐廬
欲濟非無航契闊實踐予昔聞祖父言結綬來京都束書遠鄉國井邑匪異殊
俯仰成雲仍宰木今何如事遠遺謀存審象窺眉鬚寒暑有代謝念昔同一初
躬耕樂真隱漫仕修素儒敦敘古所宗和侃寧有渝

贈昌上人二首

蕭蕭湖上波搖蕩羣峯秋客有萬古意支筇赴龍湫龍湫厖眉叟宴坐足未收
飲以一片冰熟視了不酬長松挂枯瓢風靜林颼颼境足念愈忘道充身益優
永謝巖下人深省聊自修

岩嶢蒼玉軒虛聲振寒林我昔行其庭見影復見心秀嶂出古色浮雲爲之陰
豈不念世短所樂非所歆潛珍閱幽匱羣弄誇姝音靖言事當爾江湖眇崎崟
送子歸山阿松風起寒琴

宿竹院次琪橫川韻二首

修竹手所種參差過屋山微風爲之來心境兩相閒清泉在澗底白雲在松間
鐘聲集趺坐樓深流月殘重遊啓深省解轡思掩關

昔遊玉几峯老禪肩如山機深削陳迹天馬初服閒念欲從之遊小築茅三間
俛仰二十載黃塵鬢毛殘亭亭石塔影哀猿守松關

送宋壽卿侍御迎養建康

葆真林閣下爲善心自娛農圃得休息時讀古人書施食不望報折券不顧餘

時至祿自臻門有駟馬車念昔髻鬢子遠牀衣青襦束髮專編簡操觚入皇都
勁氣摩黃鵠危言伏青蒲厖眉笑有言鄰曲驚且吁維南帝王州問俗宣典謨
匪規鼎食榮菽水心晏如種德報已豐願言廣菑畲蘭生在堂下深根佇扶疎
廣信陳氏擇勝樓

散髮碧潭際讀書叢竹邊怡情學榮觀卜築遵自然雲蘿左右嶂雞犬東西阡
羣動各有性孰念靜者憐翳翳昔賢居遺迹故老傳化爲神仙宅喬木昧蒼煙
松風起萬壑哀湍助鳴絃觀萬詎在遠泯默師韋編
潘孟陽上書不報歸里作五詠

賈生蘊奇略徒步西上書昊天有正命傷哉杞人愚鵬翼垂雲來魂氣與之俱
鼂氏竟寂寂主父復何如

襄陽孟處士拂衣歸故山放浪巖壑深流詠遺人閒舉袖巖花落擊楫江鷗還
羊公何墮淚水聲日潺潺

梅生一尉卑喋喋正天紀洗心洞玄化削跡棄妻子龍變孰能馴蟬蛻迺真止

松迴風泠泠水落石齒齒

虞卿舌轉丸揣事精微芒事危見交態窮愁名益光黃金散逝水白璧凝飛霜
丈夫有定志得失非預防

仲連匡世姿揮手卻秦軍掩袂停白日登車抗浮雲射書誠草草孤城生死分
辭榮敦薄俗矯抗離其羣

題盧溝烟雨圖

爲吳成季作

驅馬上河梁圓暈新雨紋矯首層闕魏翔鸞散奇氛猗南雙松樹百里風聲聞
束髮入紫京去住心如焚送客酌我觴我酌不得醺願化爲黃鶴朝夕隨飛雲
上以奉明主中以承嚴君往復三千年奇齡合氤氲結袂安期子啓齒歌瓊文
滑州從事持喪三年將終養其母郡表其閭

東魯秉周禮化俗何簡愉崎嶇小滕君冠蓋交道周漢帝仁且明遺令誠咿嚶
駟馬不及舌坐貽千古羞濫觴始膚寸奔流淪九州昂昂古先進免胄希前修
青松爲之枯慈烏爲之留念此歲月短解紱安林丘華楹表槐柳細石寒泉流

泯默區中人章甫慚沐猴

孟和卿旌表

濯纓息機事枕石聽流泉感彼蟻慕人駢首爭遺羶黃雲翳平壟持以防歲年
河流滔天來積浪翻中田招攜舊鄰曲寒林起炊烟冥報非我願表宅增惘然
紛紛游俠徒黃金生愛憐原生處蓬戶屢空聊自全

雲中郝孝子

混沌鑿既久重華以孝稱悲哉短喪徒稻錦顏益矜詩禮行中州衆說交沸騰
挽十不得一閉閣徒凌兢芒芒古雲中土屋塗層冰下有郝氏阡馴烏爲之增
大圭出至璞匪以雕績能寒泉冽古井零露溥蒼藤淳風詎云遠相傳在雲仍

送沙君寶宰邑

舊爲翰
苑印史

尙印宰百里寒厓水粼粼野曠牛羊低山深麋鹿馴持觴接耆老種柳迎行人
陶然樂清淨絃歌足青春

次韻馬伯庸供奉書館書事二首

珍傲宋版印
瑤臺麗層雲秋聲起琪樹織翠藻井波凝碧瑣窗霧雍容列仙集晴雪炯振鷺
念昔經啓初櫛沐合生聚簡冊迄未成春秋奉神御巍巍冠函夏握筆慚繪句
玄尊實明水越席敷大路崔蔡心匪迂終焉才名誤

其二

神京奉載筆需雲歌肆筵匪謂歲月虛聖代深養賢微蹤愧三入取禾踰十千
馳神竹素圃鴻藻儼古先羣雄寶書聚彌綸迺成編微言耿玉絜潛光媚春妍
往聖去已久八音盪敷宣元運合豹變高閣踵蟬聯夷齊迺首傳冥思豈其然

送馬伯庸御史奉使河西

青瑣倦迂散執轡踰關河黃流何奔傾積石何嵯峨承詔撫疲吐驚烏在林柯
沙場有凍骨野畝無遺禾日夕寒雲聚宿燐明巖阿訪俗感素心因之聆詠歌
詠歌者誰子被髮號天明婦死不復悲失兒誰與耕承平五十載不識戰與爭
殘雪流銀液我淚同其傾古云百二險夸誕生甲兵孰能轉夷途歷劫永清寧
清寧闡文運覽彼古帝都秦聲激豪宕洛詠夸敷腴邛山何纍纍下有白玉跣

感彼秉筆人百金盡其諛死者已寂歷茲文亦模糊偉哉龍門生悲憤有遺書
遺書紀河源荒忽不可識君行河之西春雪深五尺茫茫賀蘭山抽矢石爲鏞
坐閱三姓王聖代始斂色沙羊護氈房名駝候土驛觀風慘無儔雲端羨飛翼
飛翼西北來遺我書赫蹏中有陳情詞復憐雙雛啼野曠川無梁積荒氣候淒
雞鳴葡萄根虎嘯首宿畦清霜集素裘斗戴天益低頓轡不得上雪山在其西
其西何寥寥云有古先生巖居時一食委形澹無營朝日炫丹碧匪以斤斧成
如何驕榮子騰拏列層城驅力超北海逐影徙南溟誰能佐玄化泯默有遺情
遺情在相思舉酒不得起永念編簡功篤志刊綺靡傾蓋已云舊知我實知己
送君河之湄凍柳光蕤蕤修途馬飛翻少立盡瞻俟植德綏令名眠食慎道里
道里吾何能託身承明廬峨冠養深拙清塵避修途驅馬李陵臺望鄉問長鬚
長鬚不能對吾行益次且羨君萬里道晴霞起襜褕天山諒非遠椎牛植粉榆

月巖

峻壁飛鳥絕積鐵成臺隍感彼玉兔精皎皎芙蓉牀萬古消晦冥六月生陰涼

道人悟空幻趺坐鬚眉蒼觀境不以色湛寂回真光成虧衆妄集嘉名表其常
松聲起萬籟朝陽曙扶桑

夜集西太一宮分韻得草字

晝寂白雲深聯鑣集瀛島南枝當戶生積素流羽葆孤鐘息羣動獨鶴候清早
石枰松影侵持觴俗塵掃春風散琪樹頃刻光灑灑玄談發嘉獎夙昔恣傾倒
偶爾同心期還山寄瑤草

史氏報春堂

白雲在屋角凱風生樹端下有慈竹叢低昂候平安盈盈玉雪母光若赤瑛盤
朝奉鶴禁恩暮承龜臺歡教兒誦經史清言消綺紈築堂深且明朱光映庭蘭
寸心諒匪石寵辱非所干世故疾危岌奉盈身愈完願言樹明德朝夕應加餐
送于思容助教佐濟南廉司

黃鵠不可招越雞迺司晨圓冠璧水遊玉雪映陽春篝燈玩太古垂簾避深塵
遙望淮南山下有白頭親平生汗簡意朝昏具芳辛念之不得見顧影非我身

檄書臺上來駕輿還海濱晴風破遠浪慈烏飛且巡雲帆蔽吳粟濟用懷經綸
爲儒究理道六籍彌光新空林閔幽蘭巖霜養修筠明德在謹曷雍容奉昌辰
天師留公返真空洞步虛詞十章以導遊

巍巍道祖居層構凌丹臺手持赤龍書八景剛風開感彼下土人積劫何崔嵬
偃伏永壽命夸誕魂益哀愀然彌不寧招我雲孫迴白鶴俯前導青童戒俱來
嵯峨金碧關神魚伏深淵呼吸空洞烝子夜朝諸天頃刻風雨集咫尺星斗懸
長嘯千仞溪寥寥生紫烟飛符戒神魚歲久助汝仙

玄圃饒奇觀陽葩霧霏霏玉壺湛清冰瑤琴銷金徽混沌合空洞絕此見象機
松風代揮塵縹緲白縠衣興移暘烏逝節弭川虹飛棋局儼未終白日何熹微
蓬萊迺故山爲我一來歸真風詎永隔神光澹依依

崑崙鎮輦極鬱儀交結璘故歲非我歲寧復論秋春稽首三天師彌綸返真淳
精思彼嘉生雲施均萬民至感發自然不著亦不嗔運世有通塞六龍無停輪
洞章激微吟長樂自在身蟬蛻迺清淨跡絕虛中塵

挹秀輦醴泉蘭馥鼎初調絳旂開景光下招徹紫霄連蜺靜夷猶感彼父老邀
司命二十年守素澹不雕蜿蜒澗周原蠱虬尸江潮瓊章遏清詠丹輿導逍遙
視之不得見白雲在山椒

南嶽雲輪困英英生紫華靈游澹無蹤來集玉斧家玄螭有遺跡望斗紛騰拏
鞭撻隨三光服食制五霞上經永授之火鈴從飛車

嶄巖陽平關古松化爲人千歲永不飢食之朝帝真中有一寸玉寒光敵金銀
上結三元炁下援七祖神舉世尊禮之靜念通至仁

留城平蕪連雲深樹沈寥磅礴經濟心永劫常不彫河車孕長命方瞳生本條
瑩如珊瑚枝粲若翡翠翹諸天咸唱恭贊我玉晨朝人間倘再至玄化助神堯
仙巖鬱寥寥石倉貯餘糧云有狡獪子用物能陸梁山花聳寶髻雲蘿曳青裳
永念斷真妄帝令深且長境化道炁增變滅始真常參差應虛牝羣峯屹相望
月落杳然去泉鳴玉琮瑋

朱棗何纂纂碧桃何團團感賞千古心生世常苦煎玄翁敞珍館金母和紫鉛

三咽生羽翰空飛集諸天道烝常流灌眇眇復繇繇桑田海波滿彈指三千年
大名劉節婦吟

孤鶴不累巢離鸞不飲溪溪明難爲影巢成誰與棲飄飄無根雲流麗如虹蜺
下有貞松臺白日晝且淒我思徹霄漢冥邈不可梯青青東園柳子規當樹啼
來者何用歡去者日以迷擊石端出火擣辛能作蠶妾心倘未明請看井中泥
育王琪禪師示寂二紀嶼上人回山中因寄塔主

石塔累荒土月落冰棱棱永懷跣趺叟松風吹不磨山房舊淨供素壁一枝藤
語寂絕禪觀機深超祖乘擊石迸新火諸天化爲燈上有白玉峯丹梯杳難登
黃流鉅野漲虎嘯懸厓崩斯道倘未泯微言足摻徵

胡止水家三衢自言文定裔孫來京師三年念母以歸前述家學三篇
以相勉復成一篇以遲其來

武夷春秋功憤激渡江主寶書恣殺訛竹簡錯編組素王魯諸臣舊史足徵取
是非紀其真曲直粲可覩紛紛燕說徒誣讖增巧妬日月例愈深災異說彌壘

或言九世讐晚歲進吳楚羣公骨已朽聖筆孰與語坐曹徒深文曲學日旁午
苦心抱遺經願言復師古

泰元積磅礴日月佐經緯煌煌往聖學鉤考合表裏大道侔元功不偏亦不跛
至靜貫幽顯萬變集蜂蝟漢儒闡其端逐物失聽視旁行分戶牖蔓說糅涇渭
緬惟五峯翁正色直如矢謝彼憧憧徒感物志愈肆室虛生至和鼎渥實珍珠
歸求真吾師勗哉蹈前軌

神京鬱嵯峨冠佩清且揚祕丘積縑帙瑣窗爛琳琅有客願從遊永言觀國光
或云是鈞天九關嚴且防朝望羣馬入往來間成行彩鳳鳴聲悲裂臆思絕吭
知子親見之素心益徊徨希名養簡默勿爲衆所傷還家拜慈母祝以永壽康
春風戒重來歸雁同翱翔

贈餘姚岑易直登第歸里二首

束帶登玉署鵠袍立參差筆海春波融沈鬱流奇思俳諧詎素願阿世非吾師
寥寥天人際載牘陳雍熙嬾青味正說擬玄騁荒辭銅鼎有至味酸鹹異其宜

有客奉瑚璉願言播聲詩初歌玄鶴舞載歌鳳來儀

東浙山水國冠帶連畦畛清門徭役空華屋詩書泯晴江修竹宅燈火敦孝謹
下幃論唐虞浮榮陋朝槿擔簦京國遊射策疾飛隼精思坐待旦古巷絕遊軫
蒼松蔭婆娑丹芝凝蠹菌乘時足變化樹立在修敏

善之僉事兄南歸述懷百韻

並轡承明廬荏苒十七禩陽林集總翠奧室麗文綺寶函龍鳳章玉佩鸕鷀峙
泰帝興鴻文奎壁憲天紀榎楠購羣才弓帛徵四起番番古遺直正色論道理
深幾虎生風神契魚在水三光密轆轤一札見萬里雍容丹地近經緯審國是
霜奩賚黃柑冰盤錫朱李蒲萄與法酒承燕時漱齒俯陳天人際齧舌衆披靡
始言官高卑予奪慎其軌終言瓊林資海寓極鞭箠儉情曲如鈎讜論直如矢
或以首鼠窺或以妖狐伺奏終慶雲開再拜玉色喜天青回海雁萬柳色疑疑
屬車度居庸整隊行過蟻老臣汝居守清霜慎容俟秋風龍虎臺帳殿紅旂旒
前驅列鵝鸛後御肅犀兕分行獻瓜果傳醴復長跪念昔詞臣咫尺寫天旨

大令追風雷小言媿蘭芷約制如竟寧渾噩回正始告廷趣揚麻建社追賜璽
摛文具明訓援筆謝填委飛濤捲天吳歷塊超駮駟咿嚶恩澤侯過手直三褫
園丘導景化祕祝陋五時漢皇禮鄒枚食粟倡優比遺恨存至今文俳等方技
緬思周廷彥勢若鹿角掎懷忠牖納約凝命鼎出否追琢羅寶尊刻鏤羞玉簋
朽索馭匪輕深淵涉無涖煌煌金匱書世守司馬氏春秋尊爲經不復繼魯史
朝光鳩鵲明千花爛朱蘂松風轉回廊蒼玉振徙倚龍荒啓神武九域極芟薶
羣公儼侍御挾矢佩象珥臨河誓剖符披圖開賜履永言卑退全罔以強力恃
獻功上王所百一存寶度龜趺負穹石浮語極褒侈墨兵勦衆妄筆獄破積毀
載筆非無能終歲不滿紙坐曹心靡寧惕日頽有泚清談雜諧語陡覺兩曜駛
自取木雁中俛首供諾唯文章日輪困涉署絕臧否或云以彙升拾級上堂祀
或云選清望後至寶奇士迎塵馬交趨候門足爭累冥鴻天機深卻立賦三已
總角勇志道奇服曳芳莖澄觀竹素園讐勤徹昏晷儒宗丈人行聞欬輒倒屣
深湛皇王學揮手謝青紫辭卑相如賦操擬靖節誅淒涼五公裔渙忍羞筮仕

孤音數寡和激石轉商徵浮雲蒼狗來龜勉渡江汜湯湯黃河道桑棗日淪圯
耕童戲殘鋏一一古戰壘霜叢射新兔春蒲貫王鮪荒州靜無事拍手歌于蔦
枯灘鐵槎牙積溜玉逸邇太史非好遊所歷廣聽視振衣入閭闔姻契論不鄙
相期在霄漢薄祿慎礪砥趨朝曉同班退宿昏共止填膺雙髯張快意並手抵
談經陋茲證字窮亥豕斷絃搜麟膠滅跡問獼猿愛兄靜以絜振鷺立水泚
霧深沐玄豹日炯粲文雉鏞鍾倡鴻聲衆樂奏立伎向來論交意瞑目謝諸子
出處今不同評議實相似維吳稻蟹區民俗久瘡痍貧檐蒲稗齊富廩丘嶽峙
傾金恣聯絡所至各關市令儀養叨憤軟語包詐詭郭解都中夷景氏關內徙
坐令襍禊徒終歲力耒耜與文植清劭省罰厲廉恥重華政垂衣化俾風俗美
行行度東魯野水足荷芰微吟數魚網薄睡倚烏几漁歌起微茫逸興舟戒檝
人言居移深嘉橘化成枳不見千金泉一畝夷齊擬離羣增幽憂溽暑積憊懣
登坡帽低昂跋馬益遠企管鮑非利交金石誓生死着鞭訝先之稅駕亦逝矣
共享黃髮年斯文永綏社

題張中丞東亭圖

舊墅習真隱新亭幽且妍芳菲家林春引眺增推遷令德資先猷嗟峨白雲阡
總角精典籍承顏綺襦鮮寒泉感逝波喬木矯蒼烟欲論林間趣深掃區中緣
招攜舊鄰保舉觴問華顛雞鳴柳陰直魚跳水紋圓開田穀盈困種果花滿川
荏苒白玉京念至心惘然傳忠匪懷祿立身盡貞堅披圖耿素志功成賦歸田

曲陽李孝子

寒雲生秀嶺朔風盪修林烏兔日以馳幽翳增嶽嶽朝看壘頭柏零露珠淫淫
有饌不能舉有酒不得斟絳綵月下衣淅瀝壁上琴登堂痛躑躅審象陳輿廠
重華古孝帝五十猶素心坐令比屋封表里存遺音立名在樹德戚戚非所欽
嗟哉曲陽生束書振華簪

送趙虛一道士降香南海諸名山

往從虞伯生
降香成都

振策峨眉巔身輕瞥飛鳥懸厓飲崩流側石穿暗篠高騫蕩心目每恨所歷少
捧香南溟使絕足騰驤覆龍淵明珩秀恍惚百靈瞰乘飆訊八公挂席招五老

巖光候陰晴水氣變昏曉神君層巒倚商祭通杳眇念昔結空寂厓厓絕登眺
希彼巢居子寢作止林杪鍾鳴驛吏動危坐萬籟愀餘齡水赴壑歷塊跡電掃
韜精習澄觀俯矚八紘小

屏山堂

貫星化飛魄脩纖屹青冥何人媚幽獨喻物傳真形想此宴坐時參前平且寧
朝霞紅冉冉暮雲白亭亭中立羞卷舒廓寥慎儀刑君子法至靜處身視行庭
古聖儼未忘觴豆爰有銘茲峯合混沌胡然命爲屏天空月當戶陰風走山靈

題輞川捕魚圖

洛口疾如箭駢頭頰尾鱗散網巖隈泊千漚水花勻輞川蓮社侶百味不入脣
時危涉飄蕩急管悲青春不如漁師樂風水候昏昕連檣坐翁媪茗糜接婚姻
永謝朝市客炎涼生喜嗔

子昂墨竹

高風法清聖直筆師素王湛湛玄雲姿靈籟生幽房解珮白玉京誓將泛滄浪

所懷歲寒友臨分贈琳琅

可竹軒

種竹水邊宅岸幘晞餘清湛湛玄霧姿匪以介自名條達辭黑墳英光表朱明
寂歷巖下泉旋轉空中笙神交習真靜恬養忘虧成南國倦溽暑鬱陶起深情
展席臥其下仰見疎星行始悟晉諸賢嗜此誠遺榮我家十畝園新籜流珠纓
邈然送歸棹矯首蒼烟橫

子昂雙木竹石圖

朔雲盪空輪羣芳益搖落老木兢且巖化此雙鹿角粲彼江南枝歲晚彌卓犖
或言石五采服之混沌鑿威鳳招不來虛聲起阿閣

以劉士先子墨贈薛玄卿

虛堂集萬竈高下旭流螢寒膏玉蟲綴幽光耿晶熒巡行蟻旋磨龜手日不停
範圍金屑精膠韉桂杵靈劉氏祖子孫妙訣通玄冥沈沈緝熙殿函封英露零
龍牋掣鯨海黯淡松花馨往事歸逝水殘璧傳千齡雲館道氣寂守黑深儀刑

散髮結瓊章，摩固幽局。持此以遠慰，點翰補黃庭。

飲酒雜詩十二首

春至舊疾作，晝眠聽禽聲。總角耽六籍，萬化何縱橫。觀象太極初，始悟無虧成。
環中祕靈根，羣動一以貞。吾欲乘彩鳳，截篁以爲笙。上窮崑崙渾，下探渤澥清。
夜黑雪初白，高臥益自怡。起看庭前柳，冉冉青春姿。長松在西山，鬚髮流銀澌。
豈不念歲苦，老壯當固持。事至勿獨戚，時來詎人爲。得酒且深醉，淵明果吾師。
京師二十載，酒中有深歡。大雨卽閉戶，朔風嘗解鞍。客至輒笑之，是豈宜居官。
振容筮神著，鴻飛漸于磐。百歲苦世短，萬鍾非我干。所以東方生，吏隱神益完。
陽鳥乘南雲，飄飄振奇翮。迫此梁稻謀，居移遂成客。愧我食京塵，誓墓志未獲。
雙峯十丈松，下有千載魄。當年侍蓬瀛，香芸森寶冊。高齋集遺編，朱墨猶手澤。
戰兢愧匪承，永念在行役。

少欲觀滄海，下取珊瑚枝。穹龜負玄文，靈鱗揚朱鬣。盪舟不能往，寶氣時紛披。
有客方壺來，授簡雲差差。一以參太極，九以師庖犧。振衣海神泣，舉觴山鬼移。

少觀五嶽形五性各有殊神州養深知百靈受馳驅申申安樂翁定洛爲中居
契孫乃九遷舜詎平陽都神京屹金臺五雲玉芙蓉始知天經旋積氣爲堪輿
家鄰天台山云有二子巖巍峨太古石纖脩轟雲尖上棲西竺僧雪色垂鬚髯
二子與之遊作詩清且巖乳花散瓷甌瀑布飛銀簾醉醒夢見之謂我何留淹
南簷孤生竹歲暮柯葉蒼豈不念道里因之摧雪霜夷齊盧龍居胡爲乃名揚
入水蛤有文踰淮枳彌芳受性諒匪移臨風酌吾觴
弱冠不飲酒篝燈橫玉繩或云酒中趣湛湛浮雲蒸棄書試其言杲若烏輪升
天根轉晴雷堅城爲之崩妙言粲瓊屑逸興追飛鷹醉鄉儻可居無功乃真朋
醉中發莊語爛如錦中花急急抱蘆雁肅肅投林鴉欲別意深省瞑目不復譁
愧彼獨醒人揣摩生咄嗟下馬暮入門雙目含飛沙醉者忽復悟振衣正烏紗
江梅生空林歲晏美無度挈身踰朔易塊獨此室處氈房望朝陽耿耿不得語
雕籠粲珍禽悵望秦鄉樹爰居東門止盛饗非素茹臨風嗅其英雅志懷故土
嗟峨白雲阡種松在山腰散之不盈掬離離如麥苗迎陽漱靈津參差拂雲霄

露重碧天淨玄鶴時來巢俛仰二十年鬢齒日以彫寄聲謝玄鶴相期躡峯嶠
劉氏義門

芸閣寶書輯靖言繇外孫感彼南山豆淒其北堂萱昂昂壽母懿槐柳植高門
潛夫豈無論莫述寒泉恩時康廣女史願以銀管存

述郭楚望步月秋兩琴調二首

明月當清空流光滿西墀振衣獨徐行耿耿長相隨我心如明月萬古無成虧
偶逐區中名遂爲塵所欺抱影長夜吟別鶴同離思行矣歸故山探玄結幽期
幽期永勿緩長嘯彈朱絲

欹枕絕幽夢臥聽秋雨鳴寒葉不自持撼撼金石聲清商肅萬物此聲何不平
寤歎生遐心夙昔羞近名千金隴頭客荏苒朱顏驚此夕秋思深斷續難爲情
載歌招隱辭臨風寫餘清

送吳博文歸天台

中年因菽水絕足萬里道舊家天台山清夢嘗草草秋雲起晴姿思逐冥鴻矯

三年鄞江上微祿紆素抱緬懷揚雄宅古徑雜幽葆童年手種竹翠羽插雲表
還家恍南山訊俗憑舊老清名天所闕投冠詎終保鳴鞭踐修途置用實國寶
英才翦春葩醇語酌清醪解榻定有人行矣趨徵召青蘿冑寒猿深啼怨清曉

送人之官遼東

昂昂泰湖槩直上遼海東層波起青兕出日搖蒼龍中有仙人島卉服雙碧瞳
手披古墜蘭返真極彌縫季世日以漓神功貫鴻濛維聖居九夷駕言挹淳風
衆情習近慕飛塵哆青紅觀瀾悟玄化白雲澹無蹤遠遊豈不樂感悵非終窮

得一齋

清齋不知歲尸坐觀芸芸神珠護靈淵歷落光景分先時謹橐籥執機合網緼
淳音出虛牝百靈憺無聞九關肅夜令星斗森玄雲永玩泰始體握之密成文
緬言延年士服食為奇勳寶氣倏消蕩纍纍竟丘墳念此意愈冷幽居匪離羣

次韻蔣遠靜二首

陽靈貫奇璞棄捐荆山傍悲哉三刖翁炎空泣飛霜此寶不復試襲緹迺深藏

百神靜護之石老日月荒峨峨五彩雲散爲白虹光追琢在所用持以登明堂
猗桐生空林繁陰闕道傍永斲雲和氣十指凝冰霜玄鶴何方來鍛翮感摧藏
合爲清商曲行雲渺荒荒素心諒平和鑒彼明月光置彈集吾聽遺音在高堂
次韻鄭景尹二首
弱歲拾琪葉耿耿金石音遠爲關河遊衆嗜非所欽曳裾入承明寶策紛珉琳
秉筆直塗竄嗒然養書林維南有佳樹寸雲出遙岑遲之不肯來辭以道里深
跛子匪朝夕盟言在茲今

層臺望秋林華樹在其顛上有青樛枝爲我玄鶴延良時豈不感盤雲復迴旋
瓊英失零露百卉爭忿悁願言保遺直勿使衆蔓纏一歌以慨慷再歌朱絲絃
再次韻

潛魚護嘉鱗雛鳳含淳音束髮勇聞道執御羣公欽痛哭悼賈生敏給卑陳琳
荏苒歲月遷廁身羣玉林飛塵化玄髮所歷多崟岑精衛有猛志不畏鉅海深
遺聞理墜簡修名匪垂今

古有惜陰子觀日扶桑顛雞鳴起中夜紅光朗流延吾欲挽其馭與天同左旋
志士不並世寸心增結憤神澄水鏡淨世閱微纏纏鄙語雜謬誤奉身直如絃

觀圖書次韻景尹

少遊竹素圃學道希心傳祖德允遐聞履冰凜求全素衣入京洛飛塵浩難湔
車書煥皇度末技期雕鐫稽古在簡要敢侈三萬言煌煌羣玉府遺跡森炳然
滄波蓬壺島古石仇池天方諸變毛穎寒暑隨推遷感彼傳翫數寸心獨悲憤
淒其衣冠聚拱木思昔賢羸金白雲化青箱游蠹旋寥寥均天夢髣像追四懸
尤物詎足貴尙德庶永延愛君閱神珠出水復媚淵六籍儼遺訓精思貴誠虔
一撫玄鶴操以賡雲和絃

次韻廬山黃伯玉東漢名士十詠

食肝不知味詎爲口腹人紛綸五經學講道踰八珍古來植名士殺身以成仁
念此七箸微少忍非傷貧高誼動白日正色凌三軍仲叔固義士井生乃天民
漢季日頽靡莽莽蕭艾叢孺子南州彥獨立風雨中兩爲故人弔斯道萬物宗

湛兮如止水脫焉如捕風儉德良辟難栖栖何爲容耕稼詠典籍食志非無功
叔度長閭巷奉高獨先知盛德眇莫名鬱爲時所師朗陵一邂逅此豈髻亂兒
幽篁抱靜節游龍隱深陂至今百世下清風散肝脾仕止適天運不喜亦不違
薄遊河南道還家復牛衣

力田南山下久卑不學恭每於風雨時執禮夷踞中甑墮迺失聲此意人所同
厲行名益彰無懷道之宗郭公果善相千載我欲從

伯鸞事沈冥作勞賴仁妻身隱不願文更治山中棲浩歌五噫詠麥秀何淒淒
遐征詎遊觀鳳鳥不復來羸博慕季子居夷法宣尼幼無適俗韻與世非寡諧
至今青青冢猶有鳥銜泥

古有逃名士洗耳東海東韜精事肥遯浮雲藐王公被髮或佯狂垢形滅其蹤
季世事標榜紛紛競懼凶所以康伯徒邈焉不知終

幼安家北海流徙來東冥一帽常掛頭破席屢見經六籍躬探微衆說紛聚螢
老非諸侯客肯至三公庭華生竟天折管子終康寧

龐公老江漢性本愛居山採藥山北涯歸鷗送之還青林酒一卮白日茅三間
時許眼中士非鵠亦非鸞性不耐束帶矧肯貪王官似憐牀下子崎嶇卯金寒
靜性閱變化道充身愈安乘風學輕舉寒蘿杳誰攀

中郎天外鳳北海人中龍鳳以五采萎龍以有悔終失身匪素志尙言乃真窮
舉世習玄默脂韋爭長雄之人佩瓊琚肆言刺羣公落口掇真禍悲來事容容
蘇公起深悵蠻江盪舟中

荀陳兩家子龍鼎合雞彝昔嘗窺其圖一一無吝疵空巖古桂樹崔嵬匪今茲
想當下車時羣雛古威儀行酒拜滿戶入門揖當碑惜哉或與羣巨構頽其基
我家司徒公清德炳漢朝盈盈丙丁綬燦燦左右貂謂此非世美脫去孰敢招
榮木固同根其末千萬條勁節或峭正孤吟或清寥世遠人事疏耳冷心志消
瞻企法天運盛衰感江潮東髮六籍功矢言期久要詩來振遺響縹緲孤鳳簫
前修果未沫百世詎云遙

羣賢輔絕學嵯峨武夷峯熒熒方瞳光汲汲汗簡中緬懷文明初蒼珮極匪躬
執筆侍玉署妙語工彌縫飛塵變蒼狗潛淵閱游龍空餘經濟心勞徠飢飛鴻
濁水投神膠揚清迺奇功喬松不並世寒飈轉秋蓬生世我已後正緒遺韻蒙
惕然拜公像斯道非終窮

曾大父樞密越公嘉定辛未與先生同官奉常寶慶初同爲侍從先生被黜先公亦以論邊事去國獲拜遺像并識於後

王忠簡公嘉定入朝曾大父越公獲隨班著暨端明公嘉熙間以西山先生門人歎歷麾節先公則已捐館梅向遊學婺女得拜端明公之次子令尹道家世遺事纒纒不絕口今復見其孫申伯于鄞喬木摧落樹深爲此懼瞻仰西山先生遺像因敘事契并以自勵亦以勉夫申伯

陶道士心遠齋

少秉丘壑志養真事深寧清晨脫章甫習道誦丹經熒煌金碧居明霞敞殊庭
逃形託榮觀漠然守心局矯首西南雲飛蓋垂流鈴八表散清雨歸林何亭亭
緬懷靖節翁舉觴日沈冥之人靜且修奇服養遐齡長松舊云植秀色日以青
素心靡違只矢言寄山靈

寄題郭靖州絅齋

靈曜動囊籥萬物俱光晶湛然齋居子韜精獨沈冥飛梭織翠霧層冰瑩疎星
製為蟬翼衣無華靜儀刑愴兮神君來不笑亦不頰一以卻氛垢一以永千齡
我欲從之遊車音振泠泠

清容居士集卷第四

此處有若干行非常模糊的文字，可能是正文或旁注，因字跡不清難以辨認。

清容居士集卷第五

元 袁 桷 撰

古詩

五言

爲贛川連教授賦梅城

稜稜太古根，縈帶鐵不如。飛塵望其藩，卻走奔無餘。中有冰玉人，指揮萬瓊瑤。低昂受其職，補理成扶胥。天空斗搖寒，令嚴察孤虛。練袍立清夜，鮮明映犀渠。積雪誰爲驕，慷慨紛模糊。陰陽本一氣，開門使之俱。險絕貴有道，面壁非吾徒。司晨起視日，蜨夢方蘧蘧。

泊貫州次韻仲章

沙塵暗河津，遊雲蕩無餘。忽忽萬里念，眇眇孤鴻俱。風水淹行頓，異縣非故居。雞鳴逐前邁，殘星澹遺珠。空林野氣肅，古樹慘不舒。飢禽何其悲，驚飛挾鳴雛。迺知俛啄意，愧我將焉如。道遠怯驚隘，終憶山中廬。誓言息機事，解纓慎馳驅。初夏鬱新濤，永日誰爲娛。因之寫初志，臨風復躊躇。

次韻呂學正古意二首

初筵秩嘉賓容氣清且明至饗不在酒尊疊粲東榮傷哉崇飲徒偏宕四坐驚
中有獨醒士覲然愧非輕持觴懼濡口孤吹幽風鳴永飢詎遺禮俎實期充庭
苦心嗜昌陽古澗香莫識之人遠持贈藉以五色石密節懷黜章寒暑端莫易
三咽迴中腸起止良得力舉世希妍英椒蘭政紛職慎勿強嗜之麴泉澡其德
次韻元復初春思三首

凍樹迴青陽羈禽競新哢喧喧人語浮稍稍春事動澄心絕芳華小睡足幽夢
夢覺天宇新朝光集飛棟

遊塵逐平臬秀色翳榛莽油雲互東西鬱抑不能雨昭蘇在玄功竟夕復延佇
何當挾其巔振翮窮委羽

遠客芳草思湛湛天外舟坐令親知疎低徊此淹留古樹擢奇石清流匯芳洲
素心諒有在胡不爲茲遊

衆卉沐新雨幽光澹餘情岸幘碧窗冷卷簾白雲生起坐調素絃促軫流鶯鳴
似言田家苦招我田中行昨宵殷其雷願言興滿盈

送李德隆經歷其父居澧陽因乞郡江陵以便省養

悠悠澧陽川飛鴻去無極白雲眇何方抑鬱萬里色念之不得從肉臂誰爲翼
翩然領南郡解此終歲憶楚宮昔壯麗冠珮列瑤席瓊英輯佳思落筆洒金碧
淒其千載下正氣堅鐵石想此問俗餘酌酒追寂歷平生功名意甘旨惕朝夕
懷章遂其初居夷亦云適藝蘭襲孤芳種橘企嘉植永言區中塵過隙殊未息

節婦吟

爲蒙
氏作

幽蘭淨如洗晻靄桑麻墟天低泣清露因依護紛敷春風遠相負迺在萬里餘
明月流素光願鑒夫君裾荷戈力行役誓將保無渝難以一日歡永失千歲娛
蕩蕩明河側雙星隨斗移會合靡有覩恍惚生怪奇古意不復識今情益多疑
契闊三十春百年以爲期白首一邂逅孤芳秉華滋感此初意深臨風託長辭

次韻范德機海鵠篇

黃鵠海上來逍遙遊帝所寥寥九萬里五采紛異覩朝霏西山霞暮結平地土
喧啾舞晴翠鵠首不復頰孤鳴者何禽振翮亦遐舉愴兮邂逅之落月耿清侶
芝糧產層巔蘭珮在遠浦八表同其光欲言淚如雨臨分致黃鵠出處各有許
方壺渺麟洲輪困爲君佇

送任懷可

跼跼水上鳶游游釜中魚鳶飛不得息魚响何時蘇興言夙行邁晴秋振修途
挈衣海上州出日搖珊瑚采瓊以爲糧拾羽以爲裾妙顏感芳蕤流光耀陽烏
盛意勿復沮清氛靜無餘維南有英雲矯首出門初團團御飛蓋隨君爲躊躇
勗哉植明德含章俟昭圖

同復初功遠飲仲章家觀芍藥分韻得一字

深沈碧雲居錯落紫瓊室芳菲護餘春清和表昭質高叢吐辭剛新茁角繭粟
傾心愛膏露正色浴初日含香紫宸朝奏舞形庭份駢頭澹無妬背面意愈密
杯翻王母下斗碎壯士失霏霏玉生煙漾漾珠吐液絕容第無雙薄醉飲真一

嫣然屬幽賞爲爾寫清逸

洛詠五首示洛人張孟功任大正

晴雲起嵩嶽變化如游龍感彼金谷人聚散同飛蓬縈紆古瀍澗百井爭汲春
昔有陳思王作賦雕層空相望不得語遺情寄冥鴻金隄手所植荒淫竟無蹤
三川鼎沈淪洛水以土勝如何羣英聚千載兵甲競仙人王子喬吹笙白雲頂
下視北邙塚今爲狐兔穿斷碑化灰劫來者日以盛箕山水泠泠側聽發深省
森森古名園玩芳納玄覽澹然觀物翁欣至情不減看花烏帽落秀色起晴臉
一一卿相居舉觴雲氣湛尸坐寒暑遺妙言天地範一去三百年寒松白雲黯
昔有好奇士絕頂觀海浪神泣肝膽翻興逸天地放泥金與玉檢縱筆記其妄
茲山久寂寞着屐事幽訪太少何岩嶢兩曜隨下上彩鸞凌風翔疑有帝子降
經郭闡微言理窟洞玄化汲汲嵩山叟反復窮代謝白璧匪有瑕後賢極譏射
麟經書薨卒外臣不以假如何莽大夫簡牘得矜詫往聖旣莫從掩袂效喑啞

贈汪生

投簪事卻掃衡門無雜賓衝檐鳥雀噪魁梧見斯人遺我以明珠神光絢嶙峋
風雅久不作雄辭逞斷斷愛君春雲姿回旋轉空輪飛英不受采積潤凝青蘋
老我意苦短念此情彌親曠昔侍金鑾挽士志莫申薦禰固百一視君鮮儔倫
先聖六籍功願言善彌綸辱贈莫能報清風響蒼筠

感興

明月不受采澄波偶成文攘攘玄黃中至理孰與分南山有琪樹蒙彼山上雲
層陰閱朱光積潤養奇芬深林葆真素芳妍澹無聞昨來京國遊緇塵日芸芸
永念丘壑趣攬衣意如焚

題王眉叟溪月圖

水清不受觸月高不受浴空景兩相忘松風進虛谷之人閱真靜引手還在目
服之飛上天溪流淨如玉

書孝子卷

道旁拾枯松汲水作糜粥堂前九十母啜粥端勝肉人言五鼎養形渥迺有辱

擊鮮豈無具彼網不敢觸乃翁三尺墳慈烏爲之築亭亭忘憂花甘露手可掬
花開醉春風百歲初轉轂之士歡有餘之人何不足

夜泊城北有懷孫秦二學士

英英二學士黼黻元祐初功名軋姦黨翰墨尊寰區維昔淮南邦風流藹清都
至今舊文采老蚌遺神珠百年俎豆廢荒城屹秋蕪黑首總論武舊老時言儒
白雲去已久來往今何如蒼蒼灌木陰曾聞駐瓊裾艱難視天運俛首猶唐虞
稻米竭秋斂菱芡餘歲儲白鷗眇天末蘆葦寒蕭疎懷賢願有在佇立情躊躇

淮口阻雨二首

曉雨壓風力我帆同款段帖帖篷底眠晝日慘易短獨行旣無儔欲去不得返
冥濛水雲重寂歷榆柳斷淮流旣東馳我行安可緩縈迂沂三义始覺人語亂
艱難意如斯寒鴉佇江岸

小雨不作潮餘清在春樹冥鴻歸興深振翼美無度淒涼舊如此荏苒已增嫵
茫茫昔荆榛桑柘青幾許淮水去不休歲閱今與古風雲合浩蕩我輩勞步武

人言上水地沙流半焦土行役儻自然春雲起飛霆

詠史四首

青青虞美人欲舞不解前漫漫劉寄奴醫國真茫然風迴下相里寒沙起蒼煙
徘徊古彭城亦復多流泉二者骨已朽胡爲事春妍人生要垂芳豈託小草傳
丈夫與女子籍籍同悲憐

寰宇設天險圖書已周知鴻溝定疆理屈意陳卑辭永觀沛公豪豈無懷土思
羣雄亦鄉黨輕家迺相隨時來各忍性不復兒女悲宅年過沛宮父老垂涕洟
井邑圖新豐雞犬猶前時論功食湯沐故里俱無遺成敗論昔人興懷重嗟咨
留侯晚辟穀端有避禍意遠招商山翁不復爲漢計平生老鋒鏑帷幄乃真智
南宮論非諛意冷終有忌雍容視國本孱子匪神器此坐端可惜欲言且深慮
代王豈不佳語出禍立至羽翼從汝成矰繳幸我避百年願已足投老空立異
不見吹簫民功成終械繫

人言漢淮陰晚歲何卑陬英賢多混跡豈復論恩讎泊舟楚山川緬懷意悠悠

責人斯無難此意猶前修近世輕薄兒流落曾相投飢來或乞食寒至將索裘
一朝青雲上泯默懷深羞高視絕舊好削跡同避仇當年睚眦意談笑能相酬
韓生固瑣瑣終勝青雲流斯人我非慕微言傲羣媮

次韻仲章初夏卽事

吏隱習疏曠晨起遺世情積柳含綠潤幽葵表朱明誰云地氣高炎暑從茲生
新潦變歆溽飛塵增境盈養疴尋丈內跬步不復行雲浮晚色盡平湖起秋聲
炎涼在頃刻變化何縱橫繕性合天和愧彼塵網嬰有懷金石交飛蓋何由傾

城南亭

平生泉石意勝處時相關似聞城南亭層陰絕塵闌初夏結清讌尊學連珮環
涼襟納虛白妙顏尊渥丹高歌互激越白日虛且閒志適不願足後會期躋攀
晴霞澹天末迴首疑仙寰

讀范德機東坊豪

范子東坊居深巷蔽樛木架上一帙書牆東數叢菊明月照西山清夜勤盥沐

學爲孤鳳吟非絲亦非竹陰陽合萬籟逸響振林谷水花不受唾天衣那有觸
玉署青裳枝三嗅羞獨宿滄洲有真趣從此謝榮辱

武當張道士京師禱雨迴山中

古有巖居子抱朴尸玄冥被髮空洞遊蒼莽窮帝青手持九九文蜿蜒合揚靈
維斗司其紐習坎鞭流霆良疇已懷新燥露滋明星滌滌原野燄迴風轉塵腥
無譁夜下令瞬息不得停茲人祕玄化長跪耳默聆崑崙挾潢漢紫霧噓青萍
玄鶴滄以淒百谷奔零零浮侈不足慕趣使歸巖扃天地古橐籥鍊一清且庭
詭幻歲已暮願言養修齡

觀梅分韻得影字

月窟迴初陽瑰室習真靜深居碧雲合澄觀白日永南枝歷煙霧北雪辭嶠嶺
蟠柯翠交加疎萼玉秀整三襲雜纖繒一漱芙蓉井浴鵠採其光寒蜂妬其影
將養憂過分泯默發深省天空流蟾墮露冷玄鶴警歌罷誰與言觴至不復逞

送陳仲剛歸番陽

浩蕩南客心崢嶸西山雲憶昔登王畿縑緗集同文執簡玉署側藻思抽奇芬
明世合儒彥詎有楚越分羣姝嫉蛾眉念至肝膽焚番江匯新田甘雨催初耘
不念別者苦孤翮誰爲羣重柳積翠霧酒盡不得醺扁舟鼓新棹晴川淨芸芸
送薛玄卿歸吳子時有上京之行

飄飄江海遊渺渺關河役燕鴻有相避客子無定跡南山火雲高北山雪新白
想此六月時相顧各動色埃傍青松樹上有雙鵠翼愛君慎舟楫戒我專寢食
擾擾行路難風花亂如棘

有感

皎皎白面生長鍊學短長箕坐激楚聲大言響高堂有客將止之反脣臂欲攘
客退不敢言彼怒庸何傷盈盈百花露擬作終歲糧露晞百花隕掩袂翻徬徨

董道士雷泉齋

淵淵養空洞摩盪升天行翻車震崑崙旋空紫金明下有五采雲散絲隕珠英
以彼一寸光八表須臾成逆順有正性變合無流形火以明益枯水以堅始凝

無爲合沖澹神化凌上清

三月十二日自殿廬歸舍梨花盛開薄暮與陳汝海花下小飲
兩人一百歲共飲三十杯雙花夾蒼檜天桃倚晴臺白團燕山雪紅注天台
醉振鷺擬高下遊蜂謝徘徊昂首冠接籬捧心舞氍毹殘日凝餘霞迴風起輕雷
不念影寂寂但惜光皚皚珠衣點綴減粟尺彌縫裁團圓粧奩巧宛轉寒紋迴
香深妬紫檀色靚羞蒼苔幸茲豔陽盛不以塵土摧凡卉工後先孤根靜栽培
翫芳悟觀象擷英審掄材較轍青紫場躡藉錦繡堆高羞折腰柳逸亞橫枝梅
慙歎識花意浩蕩爲我開殿廬龍光動瑣窗駒影催相迎復相恨欲去還相陪
停雲儼若思落月寒如灰當歌願秉燭渴吻驚耽囂

送祝丹陽使武當山

夙昔山水郡浮身宅冰霜迴首楚望深乘車升武當上有天一池夾日紅熒煌
玄雲起丹甲羣螭恣騰驤攀崖靈壽杖坐石芙蓉牀琳琅徹迴鸞儼立承天香
麻衣探芝叟百歲鬚眉蒼授子以易知永視元運長摩挲古金人鞞鞞日月光

中臺古齒萃天風振層岡揮手謝來者下土何遑遑

贈陳文翁求篆扁

往聖挾天巧蟲魚構瑰奇辛勤汗簡功淪落誰傳茲昂昂子陳子掇拾靡棄遺
清齋淨無塵素壁懸秦碑似欲臥其下畫腹鬼神悲氣酣落長牋屈曲生妍姿
斷嶂立冰箸迴波捲葦絲百幻頃刻成長鋒勁如錐解衣坐晴窗青眸光陸離
客喧意自寂手敏心相違遠憐李氏子自謂一代師蒼惶大夫門筆冷情依依
得非金注昏竟墮豪俠欺我家竹石居甕牖迎春曦煩君作佳扁朝夕舒頑疲
夜月走魑魅晴雲鬱蛟螭高張駭衆客傳觀恐羣兒能事敢強迫妙處通天機
會須風日清醉墨傾淋漓

送李平叔之信陽

維昔文昌公幽蘭閔孤芳高秋振餘清百卉爭斂藏颯爽眉髮古峨冠坐鄞庠
歌詩闡溫柔宮商起虛堂絢爛五色雲縹緲鳴鸞凰至今老諸生猶能記鏗鏘
乘風侍金華蹇諤懷剛腸諫疏納帝榻百壬斂妖芒年運旣莫從精爽回雲鄉

空餘子雲宅澗水猶湯湯永思古遺直江湖眇相望
竭來芙蓉峯喬木鬱以蒼
巖然孫枝秀妙譽參珪璋投牒山水州清溪趁輕舸
羣公列贈語握手揮離觴
我生識面晚懷賢意何長慨茲衣冠冑蒹葭隕飛霜
交衢泣零落寸心實徬徨
斯文儻未墜龍虎回天章願言紹正學青雲縱翱翔

贈徐中丞二首

南海有玄鶴孤唳雲棲層天池不肯下壓此魚鼈腥
露冷懷長飢慘澹舒寒翎
空巖蔽喬松鬱鬱太古青喬松意何悄陰籟驅羣靈
下有散髮翁默誦離騷經
妙顏粲瓊芝孰視眸晶熒鏗然拔長劍神光發新硎
倏忽去已遠玄鶴空晚晚
爲言來何遲迴風起前巘

鳧氏哀吉金紅鑪範黃鍾鍾成飾雕簾岌業蟠虬龍
大鳴淳以希小鳴和且沖
高懸饗羣帝祥雲布青紅羣帝難強留一去三千秋
張筵設尊罍庸錫南諸侯
一擊黃鵠來再擊飛雲收徬徨不敢聽亟以還中州
師曠世本有左高悵誰謀
終然侍帝所天地歌同流

拙訥齋

樗櫟老薪樵雁以不鳴烹受形既非材卒莫全其生在昔有至人觀化通百靈
至言貫圖象妙思窺璣衡乃爲萬物宗熙熙遂生成髡彼青牛君深根護靈局
永哂鄉原子木偶欺聾盲設喻深止之跬步增慎兢世路日榛棘韜精事沈冥
滄江渺何許願言濯吾纓

送鄴陽劉縣令之官宣寧二首

嵬嵬馬邑州火山蒸鬱陶霜勁角弓直草淨蒼鷹條平沙細成塵迴風湧銀濤
想彼強盛時馳突聲嘈嘈烽煙徹雲表低昂望前旄樓煩古喉襟燕秦據其尻
八月秋氣肅千家釀蒲萄

帝京布文教列邑施官曹井屋魚鱗齊禾黍黃雲高幡然土俗變帖首羞雄豪
出宰試敏手良庖靡更刀善政舊謀傳據案除民饕村村煙火通長塗罷建橐
雞鳴流水遠雁過平陂翱餘情樂觴詠臨風謝喧囂

題文與可風雨墨竹

妙筆挾天巧黑雲參差高偃疑受雨深俊欲凌風翺颯爽隨卷舒清涼散塵囂
湛湛不受暑靈籟虛窗號緬懷文湖州玉雪中豪想此旁礪時葆光解天玃
老僧道機熟形影隨目逃持以深贈之生意窮秋毫高齋夜氣寂定回起層濤

答李生裕

尙書大同公會孫

英英金華伯皓首人中龍橫經古鄞水歌詩傲羣蒙

舊為鄉里教授歌風雅以訓諸生

正色侍

邇英微言動宸聰一疏不合意孤身轉秋鴻俯仰乾坤旋舊聞眇遺蹤坐令詩
書宅寒雲翳孤桐維曾秉文度月印五采虹知我夙昔似贈言啓春容清朝集
文儒直筆書清忠作史聖有訓狐裘覩蒙茸挽士貴無方正色誰為宗虛舟萬
斛積遇順凌剛風明時詎淹留曷德會有逢

題巨然楓林雅集圖

楓林集虛秋灑氣轉寥廓坡危草纖纖水露石鑿鑿四子何方來黃塵滿芒屨
據流濯其清班荆坐盤礴山童注新泉支鼎拾薪籜方囊濟勝具一一隨取索
想彼談笑時天玃脫塵縛上追巢許高下陋山王薄淒涼金谷宴腥羶甕雞樂

又疑東山遊粉鈿，汗花萼老僧習止觀。雅趣隨筆落，振衣從之遊素壁。儼酬酢
避塵軒

飄風捲飛蓬，咫尺隔煙霧。馳車與急騎，憧憧走當路。各云有所之，瞬息不得語。
山陽荷蓀翁，守舍視日暮。酌彼澗下泉，膏沐美無度。寒光映玉頰，浩論巖中趣。
永謝征塗人，看雲養真素。

次韻伯生榆林中秋

榆林月中來，今月向此出。天低鳥翼滅，野淨田事畢。驛馬西北鳴，候吏語喧啣。
我行起視夜，炯若積雪白。昂頭望玄宮，耿耿駐營室。坐令八方澄，不使萬景沒。
徘徊清影孤，躑躅悵後發。

送鄭景尹還里

蟬冤生詩書，世胄迺鄙夷。沈沈喬木宅，風煙暗茅茨。此理固莫詰，或言有盛衰。
堂堂魏王勳，談笑帝者師。風雲締嘉會，青史傳忠規。諸孫靜且秀，振鷺遊天池。
鄉社三十年，永謝紈綺姿。興至來上國，窺探挾幽奇。聞聞與見見，柳下揚鞭辭。

前聖六籍功尊聞審羣疑江源發甕口濫觴渺無涯願持一寸膠黃流化晴漪
天風捲秋濤舟楫慎所持時至諒有得衡門詎棲遲

李野齋別墅圖

別墅依平陂翳翳桑麻陰田翁理農具晴雲起遙岑于時春事初佳樹響鳴禽
先生朝出遊呼童佩瑤琴仲也行比肩叔也聲相尋與至或坐石臨流散虛襟
有客攜酒壺勸我手自斟共言羲皇時古風藹淳深巍巍居仁里盛德世所欽
三鳳在高岡參飛起清音恂恂化卑讓歲往猶傳今披圖儼見之慰我夙昔心

子昂人馬圖

飄騰天山霧盪摩玉京雲耿耿萬里姿矯首空其羣迺翁愛神俊泚筆五采分
翁歸侍帝所乘化觀芸芸彼亦與之俱追風超九垓

時松雪翁已
下世一年

題墨蘭圖

秉芳空林中介石交不黷飛英散玄佩受露以膏沐羣妖春炫晝墨守益慎獨
豈不念歲晏自獻傷我足矯矯金石交挽之不盈掬疏清湛虛心振直耿絜腹

昊天有正令俛仰萬物肅臨風獨躊躇白駒儼空谷

次韻瑾子過梁山樂三十韻

大野豬東原狂瀾陋左里交流千尋峯會合百谷水量深恣包藏神靜莫比擬
碧瀾渺無津綠樹失其浹揚帆鳥東西擊楫鷗沒起長橋篙師歌短渡販客止
天平雲覆幕灣迴路成砥鷹坊嚴聚屯漁舍暎渚汜柳絲翠如織苻帶組交窳
出日浮鉦金明霞紆綬紫一畝澆腸迴三類慰潁泚高桅列魚貫遠吹生鳳觜
前奔何無休後進復不已遶如林烏旋疾若坂馬駛飄飄愧陳人歷歷見遺趾
流移散空洲崛強尋故壘波清鳧聚陣日落魚會市土屋危可緣草广突如峙
蓮根漲新圩蒲芽護荒坻水花碧團團雲葉白迤迤濬修出飛泉闐闐搜故址
緬思重華帝允屬夏后氏彝倫著箕疇偉功傳遷史目力渺無窮行跡端可紀
前村捋柔桑沃壤接良耜餘芳錦堆爛宿麥翠圍侈迺知東魯儒終作中朝士
養源匯滉瀆包荒納遐邇驅馳屢經過感歎復慰喜南還幸遂願永雪洗耳恥

憶昔三首

憶昔白雲阡有松如車輪初日炫五采湛湛珠露勻是時十四五恍不知其因
有客笑指之慈蔭在汝身猛志親六籍百川渺無津懷刺慎所從一一先朝臣
文昌古遺直談經鬱紛綸授以漆簡書經緯通天人碧波掣鯨魚瑞錦翻麒麟
昌歎世所鄙食之迺奇珍廁身金鑾中黽俛二十春懼貽先師羞執筆常逡巡
卽今已六十誓墓廬松筠厚德靡有報淚與寒泉淪

外家甘盤宅門閔誠煒煌高懸金碧榜中有袞繡堂珠璣左右侍絲竹儼成行
幼不識慈顏到彼心徬徨每歲兩過之嚴訓具有方膏梁病居養久爾生惰荒
七歲誦詩書十齡學詞章駸尋志學歲折節師老蒼紀事法班馬冥心契羲黃
謬與時彥交寶書閱琳琅今茲乞南歸往事增慨慷興懷陶與蘇秉筆追耿光
凱風有遺思願言繼餘芳

寥寥帝王州我翁佐其治有亭名朝陽青溪清且駛旁有籌邊閣羣公集裾翠
翹翹萬芰荷雨過爭旖旎飛觴羽書來翁霍江上燧峨冠極遊談戎弁生縱恣
予時侍其旁側耳聽論議翁言不見取投劾乃謝事坐令百萬家解甲豎降幟

徘徊夕陽亭晉宋政相似

重巖圖

爲劉明叟
西翁作

夙昔慕清隱振衣躡層巒飛鳥出天末白雲生樹端稍覺所歷險撫松獨盤桓
緬彼巖中人塵世靡有干飢食千歲芝朱顏炯團團一日不見之披圖儼清歡
崩崖冱枯藤迴流起危湍微茫暝色共凌亂生綃寒心期果冥會願言力加餐

王叔載以江梅有佳實託根桃李場爲韻見貽因次其韻

百川旣東流震澤成三江學海詎有窮沂源探敦厖緬彼學古人善問如鐘撞
簞瓢豈在樂樞衣願爲邦

六籍會有厄禍絲漢晉開支離起田孟誣僞與姚梅綿叢匪正禮區區存曲臺
吟詠旣莫分褻貶以爲才

峨峨神京秀轍跡貫九有奉璋弁如雲執轡沃在手欲窮義黃心編簡滅科斗
研摩詎無念急景謝衰朽

風雨乖素期山雞鳴啾啾豈不念夙昔愛此日夕佳平明視青天義輪御中街

榮悴會有時願言壯其懷

高門深寧翁晚歲悲絕筆愛彼樸橄才化爲榎楠質春花五采妍秋至詎俱實
遺文粹東楹賤子願敘述

昔聞中書垣上有紫薇閣微言續九共妙義追入索嶽岑大廈傾作記金鑾託
深悲在廣招寥寥鈞天樂

少小不自持曲學尊蕪繁舉觴一酌之爲言護深根先天有至理能使月窟溫
談笑襲師訓詎知雪齊門

斥鷃不能飛欲作搶榆高何如阿閣鳳守真始風翱志士惜短日碩人養屯膏
蕭脂始薦鬯食黍迺雪桃

昔年委閭巷初不願祿仕紬書探異同擬作前國史念至事益非委命以修己
勿爲衆所譏不如道旁李

君才如江梅不入桃李場徬徨念先猷貫鵠始挽彊後生捕形影爭言早升堂
唯餘白髮士耿耿無它腸

董生噩上人以叔載韻見貽再次韻

關河一轍跡耿耿明天江五方各異俗中州誠駿厖吾欲上帝闡帝闡不敢撞
終然返初服養佚歸海邦

遠宦三十年石田今始開觀象慕易京登真想仙梅夙昔希匠石歲晚成輿臺
志念詎不深樸檄慚非才

弱冠慕靜居掩息空萬有老禪深愛之微笑示以手忍欲如忍事吸醯過三斗
終然寒松勁不作朝菌朽

鞞帽成戚施逆耳風其嗒昂然望南山愛彼日夕佳朝來何所見萬馬盈天街
所以巢居子終日養澄懷

辛勤下帷生涌思不停筆範鑪鎔吉金變化銷其質湛深陋雕蟲多聞覈萍實
袖手毋自藏盛世富紀述

噩師禪林秀宛在諸天閣當其調護時危石繫朽索作賦極翦裁衆物各有託
氤氳荆山玉洋洋咸池樂

玄圃有琪樹不使枝葉繁譬彼績學人芟蕪養天根歲暮霜雪至銅柯生晏温
一爲梁棟才落落懸金門

吾師深寧翁屹屹泰華高佳嘒時一遊不使凡羽翺方壺貯神藥變爲五色膏
服之生羽翰陋彼東方桃

稟性非好遊亦不願祿仕感彼獲麟翁歷聘刪魯史正緒願有傳固陋敢私己
年衰絕聞見謝彼井上李

少壯勿自摧振容上詞場鷄膏淬寒鋒談笑摩堅彊藉以雜纖羅貯以白玉堂
辱贈莫知報因之結中腸

芳思亭

大父尚書公治圃南郊有堂亭凡十五方池修廊屈折便宜兩甚亦無礙
遊事逮今荒廢踰四十年故基陳跡不復可考近築一亭雜植花木廣不
踰畝髣其萬一名之曰芳思玩其英華將以紬繹志興翰墨有紹是則先
公之志作詩示瓘瑾併求親友同賦

侃侃尚書公投紱理泉石五堂適寒暑十亭送昕夕瓊英文圃秀美蔭嘉樹碧
修廊不受雨來往隨履鳥紅雲漲方塘丹霞耀翠席嘉魚黃金掌瞥見眇莫測
辛勤三十年深逝晦朝蹟遺訓示子孫樹藝比其德浮雲變須臾百幻倏消蝕
空餘鄭公莊耕稼給衣食緬彼行樂時衆植各有職以茲一畝園髣像見疇昔
幽葩與羣卉生意日不息朝陽激靈根三咽妙紉繹曠懷事幽賞誓矣躬六籍

次韻袁季厚惠苦筍楊梅二首

食苦不願餘甘回迺稱美空巖養滋味老叟清晨起斲之玉箸圓拾以付稚子
駢頭萃豪門咀吞訝金矢維時朱明中盛德協清徵脩然在陰翳儼與松柏峙
玉液生華池可廢杜康祀含章守元吉黃中本通理絜腹表正性要以除穢滓
初如橄欖食不作卽且棄世方尙腥羶易牙正專味愧我清齋客足音蹉然似
空巖迸瓊珠蕭蕭白雲中恍疑羣仙立欲脫煙霧叢招提者誰主日出撞金鐘
笙簧激清濁旌蓋搖青紅遂令彼林谷徵索恨靡窮侍臣久歸田不數蔗椀功
頃筐遠相致齒頰生冰風昂昂長松蓋下有萬馬容同源匪異本斯文永爲宗